

帶經堂集卷四十九

歙門人程哲校編

新城王士禛貽



漁洋文十一行述 祭文

賜進士出身先兄東亭行述

嗚呼痛哉不肖同氣四人手足相依倚者四十年爾時父母俱存兄弟無故出入肩隨不自知其樂也自癸丑七月先長兄西樵死孝彈指九年思疇昔家庭風味渺然不可復得今年叔兄視不肖京邸聚首甫半載示疾二日遽成永訣變生倉卒呼籲莫及嗚呼痛哉於是不肖同氣四人逝者半矣

漁洋文卷十一行述

一

三十四日

兄諱士祐字叔子一字子側號東亭先方伯公第十孫家君祭酒公第三子也先慈孫恭人以崇禎壬申十二月八日生於常熟官署時方伯公以叅政督蘇松四郡糧儲駐節此縣因小字虞山少凝重簡默言笑不妄發性至孝在父母側怡聲下氣進止不失尺寸與兄弟友愛最深蓋沉潛篤實其天性也與不肖先後入家塾獨能強記年十許歲時嘗雪夜集東堂長兄偶簡輞川絕句命屬和兄詩先成有日落空山中但聞發樵響之句長兄激賞每為文必後出研練刻至順治丙戌年十五補

諸生娶焦孺人癸巳歲試受知督學張公黃岳拔
第二焦孺人卒甲午科試督學戴公岵瞻擊節其
文拔第一是歲鄉試後有 恩詔選諸生秀異者
入國學戴先生以兄名充賦繼娶張孺人乙未長
兄與不肖同上公車兄亦 廷試入都海內名流
投紵贈縞論文甚衆一時有三王之目丁酉秋試
與不肖舉秋柳社於明湖賦詩倡和播在人口是
歲復躡塲屋己亥不肖筮仕揚州庾子兄秋試又
不利聞不肖臥疾兼程至揚州榻前執手且悲且
喜病霍然良已時家嚴在官舍遂留侍焉辛丑七

漁洋叟卷十一 行述

二

三九九

月歸覲先恭人不肖拏舟送至袁浦灑淚賦詩別

去是歲冬復南來康熙壬寅先恭人亦就養廣陵

定省之餘兄弟論文不啻家塾長兄時官吏部在

京師寄詩云聞道汝兄去提攜慰寂寥燈花開幾

許稚子喜應饒共試南泠水同看北斗杓何時如

意舞一破廣陵潮蓋羨兄與不肖聚首之樂而悵

己之離居也官舍有竹亭鶴柴雜植梅花辛夷修

竹兄每婆娑讀書其間長至北歸癸卯秋試受知

張給諫螺浮張禮部受菴兄有聲塲屋十餘年至

是得雋年三十二矣是時長兄適奉 命典河南

鄉試便道省覲江淮間傳為盛事兩大人喜可知也甲辰會試下第值長兄以磨勘事坐累兄留京師職納橐饘黃塵赤日闌風伏雨蹴躓道路見者莫不哀憐之久之事白兄弟更相慰藉長兄賦詩四章贈兄其略云諒為死喪憂且復數相見炎蒸午不避霜露曉能踐拘幽味消息緩急視子面患難故舊踈艱虞友朋賤傷哉鵠原心匪石不可轉傷哉痛哉兄友于之義至是極矣長兄至廣陵為不肖述兄急難狀至哽咽失聲後往淫言之未嘗不流涕被面也傷哉痛哉是年冬不肖量移禮部

兄以乙巳春往迎兩大人與長兄方舟而北過家一日遂同不肖上京師丁未會試復下第戊申秋南游泛大江至姑孰攬青山白紵之勝多所題詠明年春不肖奉使相見淮上庚戌會試受知相國魏公大宗伯龔公少宰王公閣學田公翰林夏公

廷對在高等已而館選不得與適長兄再入吏部兄為留止三月比歸里則不肖亦自淮上復命便道過家自己亥以後兄弟聚首家園者止此旬月耳辛亥冬先恭人邁疾兄與仲兄日夕左右侍衣不解帶者數月壬子不肖奉命典四川試兄

視長兄京師而先恭人病復作八月見背兄徒跣
南奔長兄與不肖先後抵里倚廬共處朔風積雪
午夜相對飲泣視庚戌過家時哀樂忽如隔世矣
癸丑七月長兄殉母以死不肖兄弟疊罹大故痛
不欲生草土之餘相依爲命迄今回憶之淚猶簌
簌下也丙辰至京師謁選念家大人春秋高一爲
外吏遠近或不可知躊躇復止明年丁巳始以新
例援納中行評博戊午不肖蒙 聖恩改官侍從
兄八月來京師聚首三月冬十一月歸張孺人卒
明年己未再遊吳越省戴先生於杭州歸屢寓書

不肖幽憂侘傺有憂生之嗟不肖讀之且疑且懼
亟寄書趣兄入都謂兄弟相依庶幾蠲憂祛疾詎
意憂能傷人竟至此哉兄以辛酉二月至京師需
次之暇讀書賦詩或弈碁至夜分近和張文昌秋
懷詩十章示不肖詞旨和平無悽戾之音竊意其
懷抱少舒又詎謂遂成絕筆乎八月廿八日不肖
生日兄對客談笑竟日廿九日晨會食忽氣逆膈
痛目不見物移晷稍閒而氣滯如故九月朔日延
醫診視謂肝火投以涼劑不肖疑不可用兄不見
聽是夜四鼓遂不救嗚呼痛哉病二日無死法胡

爲而至此極耶天乎人耶兄平生入孝出弟上順
下篤勞苦彫萃而愛敬如一恪守家法持身恭謹
與人言退然若不勝力爲善於鄉黨不失色於僕
隸在家爲孝子悌弟在里中爲善士在海內爲聞
人年逾三十始一遇坎壈十餘年名卒不挂朝籍
而歿嗚呼豈非天哉兄於文尤精制舉業遠自震
川萊峰具區石簣諸先生近逮正希維節大士蘊
生之文皆沉酣其中伐毛洗髓以是屢困塲屋風
雨如晦雞鳴不已志良苦矣詩初學李長吉後悔
之不復作庚子遊京口三山乃復爲數篇南城陳

伯璣刻傳之遊吳興白雀寺與萊陽宋荔裳婁江

王惟夏虞山嚴武伯吳江葉元禮分韻賦五言古

詩舉座歎其清絕舟過犇牛賦詩云楓葉蕭蕭露

氣清蒲叢獵獵早潮生扁舟跛脚聞風水便有長

江萬里情藝林傳頌之友人計甫草著論云吾友

濟南三王西樵阮亭以早達故聲譽驟起乃叔子

之才豈肯作蝨腰者哉汪鈍翁跋不肯兄弟尺牘

云子與西樵貽上交相善得其手蹟爲多暇日裝

潢成卷時復披翫以當談笑中一帖小異當是叔

子筆耳其爲名流企羨如此兄孝出至性居先恭

人喪三年不入內寢長兄歿八年言輒泣涕姪浣
病中夜手調藥餌內行醇備人無間言雖生於世
族而窮約連蹇紆鬱結轡有負士之所不堪者卒
以是死嗚呼天長地久無相見期傷哉痛哉兄在
京師欲九日東歸與母舅筆巖表兄東癡兩先生
踐長白紅葉之約竟不能待也偶簡兄篋中自記
一條云康熙二十年四月二十三日在京邸落第
一齒此齒動搖已三年忽脫去如釋負重然桑榆
之感不覺戚然於心兄年甫及艾不宜遽作許語
豈神先告之動於不自知耶十年以來師友零落

長兄與兄則四十年兄弟而兼師友者也而皆捐
不肖長往矣天乎天乎何使我慘酷至此極哉兄
生於崇禎壬申十二月八日寅時卒于康熙二十
年辛酉九月初二日寅時年止五十中康熙癸卯
科舉人庚戌科進士候選中行評博元配焦氏章
丘巡撫寧夏都御史焦公馨孫女建昌府推官贈
太僕寺卿日芬女戶部左侍郎毓瑞之妹繼配張
氏淄川太子太保禮部尚書文淵閣大學士張公
至發孫女山西孝儀縣知縣泰孥女俱前卒子男
二人啓涇庠生娶畢氏啓淮聘耿氏女子三人適

李闊趙執桓張秉鎮孫女二人啓涇出一撫於子
男啓沔

誥封宜人先室張氏行述

嗚呼士禎數年來備遭骨肉之慘所與同憂患相
慰藉者惟糟糠之婦耳今又溘焉長往藐諸孤呱
呱無告士禎子然一身羈孤千里欲歸不能欲留
不可人生至此天道寧論念結髮以來二十有六
載甘苦患難無一不與婦共之忍不投涕略述以
負地下宜人姓張氏鄒平人曾祖諱一元巡撫河
南都御史祖諱延登都察院左都御史謚忠定父

漁洋文卷十一 行述

七

三方字

諱萬鍾江南鎮江府推官母李孺人生母景碩人
宜人生數歲明慧嫺姆教爲鎮江所奇愛而先吏
部兄鎮江兄比部公子壻也因復以宜人字予甲
申之亂公兄弟攜百口南渡僑居金陵乙酉去金
陵轉徙京口外舅以疾歿於金沙宜人隨諸母崎
嶇兵間備歷艱厄丙戌始歸故里先慈孫宜人隄
視之時宜人十歲髮覆額矣舉止如成人先慈歸
道之而喜可知也庚寅于歸年甫十四李孺人以
宜人少孤憐之結褵之夕教誡備至且以屬丘嫂
乃宜人敬事舅姑上逮先祖方伯公如女子之事

父母處諸姑娣如曲盡恩禮時子方為諸生與諸兄讀書家塾每至丙夜不歸宜人一燈熒熒縫紉以待無倦容辛卯子中省試乙未成進士李孺人景碩人持宜人喜極而悲內外族黨畢賀宜人願歛然自下無幾微態色癸巳長兒啓涑生丙申次兒啓渾生兩大人愈益喜謂新婦能相夫有成且宜男也當是時兩大人年未及艾內外諸孫二十餘人每晨起予兄弟前問安畢宜人與娣如次第集寢門諸孫輩雜進嬉戲於前兩大人頷而樂之而宜人性勤儉柔婉以是尤為先慈所愛己亥子

謁選人得揚州府推官明年庚子三月之任先慈以幼妹將婚不果行惟家嚴就養官舍宜人承歡順旨雖一衣一食勿弗躬親者壬寅先慈就養廣陵會兒啓沔生宜人晨昏率諸子進食兩大人輒欣然為加匕箸予服官五載兢兢以潔廉自勵庭絕苞苴宜人怡然以兩家祖訓相勸勉以為君能如此始不愧清白吏子孫了無世俗交謫意凡薄俸所入日用所出一稟家嚴未嘗有纖毫私蓄為羅綺金翠之飾也甲辰予量移禮部乙巳去揚州是歲宜人始嬰疾丙午冬攜諸子來京師甫一日

病作幾殆松江朱君投以參附之劑三日復甦自
是強半在藥壚間矣丁未戊申間予與汪戶部茗
文劉吏部公馭梁侍御曰緝李學士湘北陳閣學
子端諸君為文酒之會四方文士游京師者時湊
邸舍宜人知子好賓客肴核酒茗必手治不以委
臧獲或鮭菜不繼輒脫簪珥付質庫中兩人更以
此相樂也憶辛丑在廣陵閩中友人許天玉公車
北上以缺資斧來告會囊無一錢宜人笑曰君勿
憂我為君籌之除腕上跳脫付子曰此不足為許
君行李費耶子亦一笑持遺天玉天玉作長歌記

其事頗援古賢媛為比同里徐東癡隱君貧且老
雖凍餓不干人每嚴冬風雪無禦寒之計宜人輒
出絮帛屬子曰君得勿念徐先生乎曷以遺之其
與子同志相助大抵然也已酉兒啓沂生會子奉
使權關清江浦攜家南下與宜人別於祝阿宜人
歸為兒凍娶婦會兒渾入縣學為諸生先是戊申
兒凍已入太學兩大人喜謂宜人曰爾吾幼子今
見兩孫成立一孫又已授室且汝夫婦少年已有
四男子大慰老人懷抱是歲九月宜人攜諸子子
婦俱南庚戌及瓜歸道里門是時先兄西樵再補

考功家兄東亭初成進士子以使事省覲宜人與諸娣姒拜慶高堂宗黨皆艷稱之居無何宜人偕子北上留兒涑夫婦於家侍養兩大人行甫十日而兒婦以產歿矣家門多故實肇於此辛亥迎兒涑來京邸六月二十六日為宜人設悅之辰兒子四人羅拜堂上宜人念兒婦愀然久之既而曰吾少而孤今得天可謂厚矣又敢求多邪未幾兒浙病死宜人悲悼過甚又未幾聞先慈有疾子與先兄倉皇謀請急歸宜人亟贊成之而家書來謂先慈疾漸平復戒勿歸宜人日夕至廢眠食壬子正月

漁洋文卷十一 行述

十

月遂命兒渾歸省製冠帔寄先慈手自經營者累日先慈見之猶為一解顏也三月兩大人為兒涑繼娶是月兒啓汧生於京邸六月兩大人遣使迎兒渾歸娶將行而渾病歿宜人益悲不自勝自是病日增形神日悴矣無何子奉使入蜀時兩喪愛子宜人病骨支牀而子有萬里之行宜人慮傷子心破涕為笑反覆慰譬扶病治裝刀尺之聲與嗚咽相間惟恐子之聞之也初秋朔日出都宜人強起闔門送子反袂拭面意若永訣者子途中寄詩云何必言愁始欲愁離騷端只是離憂兩年再墮

童烏淚萬里虛為諭蜀遊落日深山聞杜宇秋風
古驛下金牛傷心欲寫蠻箋寄十樣空傳出益州
次灞橋再寄詩云長樂坡前雨似塵少陵原上淚
雪中灞橋兩岸千條柳送盡東西渡水人宜人見
之攬涕而已八月東歸途次聞先慈大故十一月
奔喪抵里臥起苦次踰月始與宜人相見相對如
夢寐矣逾年先兄又以哭母死子屢絕復甦宜人
涕淚之餘凡予飲食起居調護備至予非宜人其
不瀕於死者僅矣自先慈見背宜人事家嚴澣衣
帚潔滌澹罔敢或怠姊妹歸寧宜人食必與共纖

三九卷三
漁洋文卷十一 行述

十一

悉周至諸姊妹嘗歎曰吾輩無母微弟婦無歸矣
嗚呼悲哉勿論宜人夙昔婉淑無慚婦德卽五年
中爲予上事嚴親中恤姊妹力已殫矣心良苦矣
予豈木石忍須臾忘之哉乙卯二月予服闋三月
邁寒疾宜人衣不解帶者月餘貌爲之瘠閏五月
予北上拜別先慈靈幃不覺慟哭宜人亦哭失聲
九月予暫歸省明年正月十一日再北上宜人歡
然無離別可憐之色嗚呼詎謂此別遂永訣耶春
夏間屢得家評皆言無恙重九前一日忽接家嚴
暨兒輩手書言中秋前四日宜人忽得腫脹之症

需蔓甚急時風雨竟日落葉滿庭行歎坐愁傍徨
達旦次日遂遣急足南行豈知遣使之辰卽為宜
人長淮之曰哉嗚呼悲哉士禎獲罪於天頻遭慘
酷自庚戌後哭母哭兄兩哭子一哭姪一哭子婦
期功之戚無歲無之今復哭宜人於千里之外予
何以為情哉抑人情最不能忘者所與共憂患之
人也宜人十四歸予二十年甘苦兩人相與共之
數載以來牛衣對泣憂患亦惟兩人共之今歿者
已矣生者奈何矧上有七旬老親下有呱呱諸穉
誰代予仰事俯育者度宜人九泉有知目且不瞑

漁洋文集卷十一 行述

十一

矣宜人少失怙兩母氏相繼棄養景碩人之歿宜

人在淮南不及見言輒涕零甲寅臘月始為碩人

啓寔合葬旣竣事曰十年來常懼溘先朝露無以

見吾母地下君為我了此無復憾矣嗚呼孰意葬

逾期年宜人竟從母地下乎宜人孝敬出於天性

一鮮之微不進舅姑不敢輒嘗或在遠不能致未

嘗敢忘也予三蒙文綺之 賜宜人必手自封識

寄上兩大人未嘗自御從宦將二十年無私貨無

私蓄尤人所難居先慈憂蔬食三載兒輩未即吉

不令肉食每逢忌日及霜露之辰設祭必盡哀悽

愴終日與子終身相莊不聞諛語女奴終歲不聞
譙訶雖僮僕之子女時抱持啖以餅餌其慈惠如
是宜人生閱閱而綦縞自好有桓孟之風一衣雖
數澣洒不忍易也予性疎散好讀書不問家人生
產宜人以勤儉佐予內外秩然今已矣今年夏予
偶讀文選至潘騎省悼亡詩輒閉目不欲觀又客
秋過河間和沈啓南鈞弋夫人歌一篇語近不祥
輒削稿他日入室思人流芳已歇遺挂在壁憶騎
省之詩豈非神先告之乎悲哉宜人嬰生艱之至
極又薄命而早終病不及知斂不及見訣語不及
聞天荒地老此恨何窮哉宜人生於崇禎丁巳六
月二十九日丑時卒於康熙十五年丙辰九月初
十日午時得年四十生子四人長啓涑例監生娶
梁氏繼娶梁氏次啓渾庠生早卒次啓沔庠生聘
王氏次啓汧聘鮑氏

祭 誥封奉政大夫李太公文

代祭
酒公

嗚呼先生而遽返於真邪予嘗讀洪範九疇其言
五福一曰壽二曰富三曰康寧四曰攸好德五曰
考終命釋者曰人有壽而後能享諸福故壽先之
又曰康寧者無禍患也攸好德者樂其道也考終

命者順受其正也此五者王道之所先而古來賢
聖之所難必也乃今於先生畢備之而又何悲先
生天性坦白胸次恢廓視天下可喜可愕之事舉
無足以動其心而又邃於易理不啻韋編三絕漆
書三滅悔吝之來皆獲貞吉此先生之克遠禍患
也處貧而無戚戚之色居賤而無赫赫之容馬伏
波云貴可使賤富可使貧人之所難惟先生實有
之九十五年帶索行歌不改其樂此先生之樂其
道也而且子姓繩繩先後以文章經術顯名當世
凡古賢聖之所難必者悉於一身備之計先生之

所未備者富耳然以清白貽子孫所得孰多累茵
列鼎非先生所屑也生而上壽歿而考終全受完
歸備時五福歷觀古今來如先生者有幾人哉榮
啓期貧士也衛武公賢諸侯也文潞公賢相也出
處名位不同而其年同其道同以予觀於先生殆
一揆矣而又何悲顧予之不能已於悲者予與先
生生同里聞世爲婚姻早歲論文白首無間頻年
以來先生與耿伊諸翁修洛陽九老睢陽五老之
會予齒忝隨肩亦叨末席典刑忽遠此樂中衰此
予之為暮齒悲者一也先生而在能使鄉之風俗

還淳廉頑敦薄俾後生有所矜式所謂善人國之紀也乃今已矣子皮死子產哭之曰吾無與為善矣此子之為世道悲者二也寢門之慟謂子其能已乎乘白雲而不返望黃鶴於帝鄉絮酒炙鷄靈其鑒格嗚呼哀哉尚饗

祭孫無言文

嗚呼無言而竟死邪子與無言交二十年悉其為人
大抵忘機而任真尚名義而鄙榮利棄妻子如脫屣而於文章朋友之嗜不啻飢渴之於飲食故無言一窮老布衣而名聞天下無言家在黃山三

十六峰之下遊廣陵不歸新安人之家廣陵者率居奇贏操白圭之術而無言獨為窶人居闒闖中委巷掘門餅無儲粟然四方名士過廣陵者必停帆伏軾問孫處士家屏車騎造謁無言不甚為詩而好朋友之詩嘗刻諸家填詞獨購彭十羨門之作不可得一日附估船往海鹽予問之曰將訪彭君耳然舟楫雖具實無隔宿之舂渡江徑去弗顧陽羨陳其年贈以詩所謂秦七黃九自佳耳此事何與卿飢寒指此事也無言之於文章朋友至性類如是無言有子依其族人賈汴之朱仙鎮一昔

死窮益甚予在廣陵五年無言未嘗數數來見然文字之飲未嘗不共尺一之牘終不一至也予在京師慮無言貧老無以給餽粥有故人爲權使以無言姓字語之旣而終不往見也人知無言之通抑知其介如是邪康熙乙巳春先考功兄南遊廣陵愛無言之爲人與之徧訪鶴林招隱諸名勝旣而入吳適越亦挾與俱凡客西湖三月四方名士或因考功以識無言或因無言以識考功二人者交相重也先兄旣歿無言數有書抵予一歿一生交情如昔予讀之未嘗不涕泗流離也乃今聞無

言之死而益痛念亡兄腹痛之悲其能已乎客歲

無言書來自言老營一室名曰繭窩同人多爲賦

之索予詩未有以報也而無言歿矣悲哉悲哉無

言常欲歸隱黃山故廬索贈詩至數千篇或曰無

言喜賓客厭寂寞其不歸黃山必矣乃今而後真

不歸矣又聞無言有親未葬其歸者欲以葬其親

也而今竟已矣豈不尤可悲哉予欲爲無言立傳

而未果因略述平生與予兄弟論交者如此以付

其族弟思遠俾告於褚幕之前無言有靈尚其鑒

我嗚呼悲哉

祭張母景孺人文

嗚呼叔姬歸鄴春秋必書詳卒及葬聖經炳如維
臣有君維婦有夫疾風勁草大節不渝絕脰引決
慷慨捐軀飲冰茹檠隱忍存孤二者孰難譬嬰杵
曰下報易耳嬰功則右猗與孺人五代相門時移
運往流風塵存晉陽之祥鍾為女士白玉青松芳
蘭貞桂泉丘異孟絡秀同周邦之媛子君子好逑
德容言功罔不美備圖史在陳珩璜是佩維鎮江
公義薄天雲孺人相之中饋是勤維李夫人德齊
樛木孺人佐之壺儀攸肅清河鼎貴列戟盈門綺

三才十二
漁洋文集卷十一 祭文

十七

穀阿錫璵璣瑶琨孺人居之澹然荆布無非無儀
含貞履素銅馬之亂盡室南轅絕淮涉江道路間
關孺人從之憂患共濟上慰夫子下撫童稚天胡
不弔鎮江云殂白馬旒旒哀哀道塗大樹飄零寒
風蕭瑟將相鬚眉國殤魂魄天衢旣泰南北彝行
孤兒弱息旋歸故鄉烈哉孺人甘荼如薺皎日秋
霜誓死勿貳宛若相依星二十周語不闕門操視
柏舟提攜弱女姆教孔至我思古人大家無愧心
力旣殫成此室家謂享壽考景福方遐阿母西池
夫人南嶽鶴馭忽來雲駢竟邈義御不待干支倏

逾九原虛左來何暮與長白之陰載啓舊隧瞻瞻望
靈輶潛然涕泗嗚呼哀哉

帶經堂集卷四十九

四九

漁洋文集卷十一 祭文

六

帶經堂集卷五十

歙門人程哲校編

新城王士禛貽上

漁洋文十二 書後跋

書殿閣大臣年表後

予觀殿閣部院大臣年表至天啓癸甲之際未嘗不廢卷而歎也嗚呼明之亡決矣先是壬戌歲大司寇王公紀及諫官侯震暘等交章論大學士沈淮罷之芮城雖與同罷然衆正在位勢猶可爲而御史劉璞已恐有進紹述之論者其在易同人之九三曰伏戎于莽升其高陵此一時也至癸亥正

漁洋文卷十二 書後

一

月顧秉謙相甲子正月魏廣微相於是福清蒲州相繼逐趙忠毅高忠憲以謝應祥事得罪去是時楊忠烈二十四大罪之疏適上擊逆璫者章滿公車奄遂殺萬公燦以立威廣微呈秀之黨望風羅織而清流之禍成矣其在易之否曰內陰而外陽內小人而外君子此又一時也諸君子有類族辨物之明有不亂羣之守有田狐射隼之志而無遇主于巷之機生謫窮荒歿填牢戶元氣旣剝國運隨之雖以愍皇帝剛健足以撥亂反治而卒無救於危亡悲夫按家乘先伯祖太師公以甲子三月

致仕崇禎元年戊辰八月起田間加少師出鎮宣
雲皆與表合方是時吾家諸祖父列仕版甚衆而
先祖方伯公以丁巳京察謫叔祖中丞公爲應天
巡撫劾織監李實吳江貪令曹欽程光祿公官保
定同知不拜璫祠罷官考功公與太師公同列名
東林籍貫同志錄點將錄諸書無一人比匪隳其
家聲者可謂難矣爲子孫者其可不勉與

書劉龔冢碑後

崇禎九年秋廣州城東二十里北亭洲田間有雷
地奮而成穴耕者梁某投以石空空有聲內一雄

二五七七

漁洋文卷十二 書後

二

雞其中逾夜雞鳴凶恙乃發之有金人如翁仲者
數枚各重十五六斤有二金像冕而坐者筭翟如
后妃者各重五六十斤地皆金蠶珠貝旁有鏡一
光燭穴中寶硯一硯池中有玉魚能游泳他異物
不可指識者甚衆梁攜歸光動四鄰鄰人覺而爭
往遂白之官有司親臨發之隧道如城高五丈餘
深三丈中有碑乃偽漢劉龔冢也文曰維大有十
五年歲次壬寅四月甲寅朔廿四日丁丑高祖天
皇大帝崩於正寢粵光天五年五月癸未朔十四
日丙申遷神於康陵禮也文多闕不盡載末云翰

材學士知制誥正議大夫尚書右丞賜紫金魚袋
臣盧應初撰并書按五國故事龔天福壬寅歲四
月避暑甘泉宮未幾殂通鑑及十國春秋皆作三
月據碑當以五國故事為正十國春秋又云康陵
在興王府城東二十里之漫山陵中以鐵錮之堅
不可啓光天乃龔子玠年號玠立僅二年為其弟
晟所弑即改光天二年為應乾元年按光天無五
年十國春秋稱殤帝光天元年八月葬天皇帝於
康陵與碑皆不合又考偽漢諸臣列傳止有盧
膺仕巖為工部侍郎才藻俊茂晟時拜中書侍郎

同平章事無應初名識之以俟博雅者考焉
書先考功兄年譜後

右先兄西樵先生年譜一卷士禛忍涕敘述什得
五六蓋先生嘗欲自為之而未暇以為譜之作先
生志也先生生平言行信於家庭無間於鄉黨寮
友此譜多未及詳約而言之其不愧古人者有數
端焉孝事二親下氣柔色終身無跛倚唾涕一也
友愛諸弟疾痛苛癢若身受之文章經術兄道兼
師二也平生不愧屋漏所為無不可以告人三也
與人交不可得而親疏久而敬之所謂澄之不清

撓之不濁四也讀書味道蕭然終日或蘓蘇不覺
不改其樂終身未嘗問家人生產五也樂易坦白
胸無城府籬棘而是非可否之介屹然如山岳之
不可奪六也家法恭謹恪守勿失出則徒步閭里
長老不知內史貴人七也不謁令長不以竿牘溷
公府八也居京師足未嘗至賢人之門逢掖過從
如遊蓬戶九也性耽山澤如陶貞白入官松風之
夢固在垂組影纓寄焉而已十也文章名世而單
門晚生一語之工心折下之不惜口齒為之煢成
名譽十一也清真簡遠吐納風流終日無俗語十

二也兩居銓曹家徒四壁立負郭之田無增於舊
十三也屢更艱穉天鈞泰然深得中庸素患難之
旨十四也居母喪一循古禮未暮竟以身殉十五
也若其方正廉直外和中介卓然有古名臣之風
解巾登仕首尾塵十載屢遭顛踣不獲少伸其志
可謂窮矣不得已而託文章以自見時時太息於
千秋萬歲誰定吾文之言嘗謂漢隋以來藝文經
籍諸志及通志通考諸書所載有著書千百卷不
傳一字者孫樵盛推賈希逸歐陽永叔言鄭條為
古文在尹師魯前而二君文采寥寥於後世名豈

足恃邪今先生著書惟然脂集二百三十餘卷條
目粗就餘如讀史蒙拾朱烏逸史實實別錄閨閣
語林南榮曝餘錄羣言頭屑諸書率未卒業詩則
世多知之者顧傳之久近有物司之追維風昔之
言良可悲已不孝士禛與先生為兄弟四十年矣
撫我則兄誨我則師真有如子由所云云者先生
既歿禮部公泣謂士禛曰而與而兄實有牙生輟
殮之痛豈但鵠原之悲也因而慟絕士禛迷罔之
中略次生平出處如左冀世有史筆或傳之獨行
或錄之文苑儒林庶幾九原可作歟且不朽獨是
先生孝友忠信守死善道而卒顛頓軼軻年不及
五十以歿皇甫湜悲汝南子桑云謂善之福夷死
何餓謂惡之禍跖歿何肥悠悠蒼天其可問哉苟
卿有言死而不朽者壽先生求仁得仁一死固已
不朽禛將援此以少紓其悲焉然以先生之孝友
忠信而獲報於天者竟如此矣復何言哉復何言
哉

王東臯先生紀略書後

古人於師弟子最重東漢以來猶有古之遺風歟
生患難之際去官行服伏質上書者比比而有如

朱博之於陳咸廉范之於薛漢是已東臯先生一代名臣未究其用以歿天下惜之而遺孤又孱弱其門人白子仲調官京師聞赴既為位而哭又於慈仁僧舍要經受唁予與戶部侍郎魏公學士葉公言之每共相歎息嗚呼古道之不行久矣白子既力行古道於舉世不為之日而又懼其師之言行湮沒而不傳於後於是又為紀略一卷既以報其師於地下且以慰其垂白之母煢煢之孤而將來國史之書太常之采與夫天下後世慕東臯先生之風而思論其世者皆於此有考焉又不僅師弟子之誼而已也

三才子

漁洋文卷十二

書後

六

跋古周易

按張景春吳中人物志云吳人傑字斗南崑山人登淳熙進士第官國子學錄嘗講學朱子之門所著有古易十二卷周易圖說樂舞新書廟剝罪言郊祀贅說鹽砮論丙丁各二卷禘祫縣葛書三卷集古易尚書洪範辨圖一卷兩漢刊誤補遺十卷并行於世此其平生著書之一耳

跋易雅

按袁伯長清容集載其先人師友淵源錄云趙汝

襟善湘子為宰相壻卑退自修精易象有易敘叢
書官至戶部侍郎晚歲以理財進用失士譽所謂
叢書豈即此邪

跋左傳補注

趙子常先生經學為明初儒林之冠少受春秋於
黃楚望著春秋屬辭十五卷宋文憲公亟稱之別
著集傳十五卷師說三卷而此左氏傳補注十卷
海鹽陳緯度光緯遺子舊刊本古雅可寶惜因
與新刻東山集同藏篋中緯度博雅多讀書嘗著
竹素辨謔二卷客歿京師殊可哀也

跋玉楮集

宋岳亦齋所著書有程史愧郟錄金陀粹編各若
千卷其詩名玉楮集者予夙昔聞之而未見康熙
乙卯春二月與張子杞園同客青州每獲祕本輒
共欣賞此書其一也集中贈李微之祕監詩自注
云微之以史館牒來索予所撰東陸筆略云云亦
不及見不知尚傳於世否俟更訪之

跋杼山集

唐釋晝杼山集十卷有湖州刺史于頔序首載敕
浙西觀察使牒湖州當州皎然禪師集牒得得集

賢殿御書院牒前件集庫內無本交闕進奉牒使
請速寫送院訖垂報者牒州寫送使者故牒貞元
八年正月十日牒都團練副使權判兼侍御史李
元使潤州刺史兼御史中丞王緯按唐六典集賢
殿學士掌刊緝古今圖籍凡天下圖書之遺逸賢
才之隱滯則承旨而徵求焉當時一衲子之集至
勅觀察使牒本州寫送御書院其於文章之事可
謂勤矣後世亦豈易得哉此集為吳郡馮舒鈔本
詩七卷碑誌書序雜文二卷聯句一卷按張睿卿
所編吳興五家集僅四卷篇目略同

三九七

漁洋文卷十二跋

八

跋笠澤叢書

康熙甲子春予在成均從溫陵黃俞邵借笠澤叢
書係江西士夫家藏鈔本以甲乙丙丁為次喜其
古雅可寶惜錄而藏之然舛午甚多如乙集中寒
泉子一篇脫落竟至十餘行頗取文粹補正又附
錄小名錄序一篇夏五月端午後二日儵人顧淵
自虞山來得毛辰斧季書見寄此本蓋宋元符蜀
人樊開本而都穆重校刊者二本編次篇目略同
惟耒耜經江西本分耒耜數另為一篇而蜀本甲
集有樊序丁集末有王益祥陸德原及玄敬三跋

又有續補遺賦四篇皆江西本所無又紀錦裙在
丙集迎潮詞在丁集築城詞在補遺中與黃本次
第小異耳予舊藏皮襲美文藪舊版本獨恨不得
叢書合為一函今一旦獲雙璧快何如邪因揮汗
志之時陪 祀方澤齋宿國子監東廂書

跋河南集

尹師魯為古文在歐陽子前前乎師魯者又有穆
修鄭條柳開輩開河東集予從溫陵黃俞邵氏千
頃堂鈔得藏本穆修參軍集則代州馮秋水方伯
順治間刻於金陵唯鄭條集未之見然二集文皆

三乃五
源洋文集卷十二 跋

九

疎拙而石守道徂徠集尊開之學不啻李漢輩之
於昌黎此不可曉也師魯河南集二十四卷詩一
卷餘皆雜文前有范希文序蓋北宋人文章之傳
於今日猶得見其全如此集者塵矣惜寫本多魚
豕之謬恨不得別本讎對之姑校正其可知者餘
則闕疑不敢妄有竄改云

跋武溪集

宋余襄公靖武溪集二十卷成化間丘文莊所得
秘閣本嘉靖中衡陽劉穩重刊之韶郡者有宋尚
書屯田郎中周源序予過曲江秦令熙祚以此本

見遺云購之一老儒家秦山西聞喜人其祖為先
太師門生有孔李之誼云康熙二十四年孟夏記
於韶石舟中

跋河東集

宋如京使柳開仲塗文集十五卷附行狀一卷門
人張景所編亦名河東先生集其文多拗拙石守
道極推尊之徂徠集有過魏東郊詩一篇至上擬
之堯舜臯夔伊呂下擬之遷固通文中愈又嘗作

怪說三篇以詆楊文公比之狐媚臯鳴噫亦諄矣

湘山野錄云景字晦之避難逋竄改姓名曰李田

三〇卅

漁洋文卷十二跋

十

所至題曰欲識我蹤跡一氣萬物母景作柳集序
首云一氣萬物之母也故云然

跋未備五經注疏

近日士君子留心經學者頗有其人宋元諸儒撰
述亦漸出餘姚黃梨洲宗義晉江黃俞邵虞稷聞
見尤富此未備五經注疏一卷乃鈔自朱竹垞太
史者太史手鈔經學書多至百種此蓋較西亭王
孫授經圖所載而未備者然亦可謂博矣竹垞又
著經義存亡考若干卷聞已成書惜未之見

跋石田集

伯庸家世雍古部人至其父始家光州為御史嘗劾姦臣鐵木迭兒十大罪以勁直聞非僅文章之士也然史稱其文宏贍而精核以先秦兩漢為法詩圓密清麗大篇短章皆可傳其詩文蓋有過人者方山比部鈔石田集文與詩凡若干首予借觀因題其端俟他日更訪全本

跋元遺山詩

張祐詩人生只合揚州死禪智山光好墓田元遺山擬作兩句云人生只合梁園死金水河頭好墓田蓋哀金宮人之被俘擄者亦如宋末孟鯁折花怨鮑輓重到錢唐諸作諷謝太后北行之意與張詩語同而意義迥別也

跋葉文莊公集

葉文莊公集流傳絕少世所習見止水東日記若干卷焦澹園經籍志載涇東文集四卷不知何據詢諸今侍讀學士訥菴先生云公集未嘗板行也此集學士家藏本不釐卷次後有族譜一卷宣鎮志諸序一卷別有涇東小稿一冊文間有異同塗竄甲乙皆公當時手筆卷首有巡撫宣府關防蓋公天順八年自兩廣移鎮宣府後手稿也史稱公

文章似歐陽文忠生平慕范文正之為人行墨之間鬚髯可見予讀公文獨愛其和平易直得古人修辭立誠之旨公之世後於東里先於西涯守溪其文亦與數公相上下蓋宣德以後弘治以前先輩文章師承大抵然也予總角知慕公之風愧固陋無能執校讎之役敬跋數語以復於學士聊致私淑之意云

跋金薤琳琅二則

都玄敬在成弘間號博雅著書甚多金薤琳琅其一也其書在歐曾呂趙之間頗稱精核予購之有

年矣康熙二十四年張子石宗始為予得之吳郡予時自東粵祭告歸復命京師天津舟中與坐臥者累日近人所撰如趙岵之石墨鐫華郭景昌之金石史于奕正之金石志葉封之嵩陽石刻集記皆嗜古之士其書予家皆有之今得此書四部書庫中為不寂寞矣

向從禾中朱翰林竹垞所見南昌王孫厭原山人所刻古鐘鼎款識乃自石本臨摹以授黎棗者古雅不減宋槧若得之以成雙璧可敵十五城矣年已知命書癖尚爾佛家所謂結習者非邪

跋沈文端公家書

右歸德沈文端公家書一通語語聖賢忠恕之旨
予方欲續明名臣言行錄因從牧仲比部借歸手
錄藏之然以文端敬慎如此而猶不免四明之忌
妖書之獄震動天下吁可畏哉康熙十七年夏五

跋祝枝山書

祝京兆書原本晉人為明代之冠世所傳類顛素
草書者皆贗也予在廣陵一士夫家見京兆家書
十餘紙道美圓勁與此略相似信為希有至八詩
高古頗近韓文公琴操而京兆自序擬於白太傅
秦中吟殆不然也康熙丁巳詔菴學士攜以見眎
遂題其後

跋邊習詩集二則

順治癸巳曾假閱此集於東癡先生康熙癸卯予
在揚州作論詩絕句中一首云濟南文獻百年稀
白雪樓空宿草菲不及尚書有邊習猶傳林雨忽
霑衣著其事也今歲癸亥在京師復假此集先生
報書云大水之後藏書盡付波臣獨此集以高閣
幸免嗚呼豈非神物護持之以待後人之表暴邪
予因迴思隍事自癸巳至癸卯十年自癸卯至癸

亥又二十年忽如旦暮而子且由少而壯由壯而老而東癡已稱七十翁矣不勝感歎遂點閱一過為錄副謀刊之而歸元本於東癡聊跋數語以志歲月

予癸亥跋此集意欲刻之京師而以刊本并元本却寄東癡共一愉快不謂是歲東癡歿於江西是集因循未付黎棗事之不可料如此言念夙昔為之惘然

跋弘正詩鈔

海豐故太宰夢山楊公詩子曩居京師既選其最者

漁洋文卷十二跋

十四

刻梓以傳又得檄餘錄以授其縣人吏侍冰壺王公諾為重刊會其卒此事未果康熙戊辰春以謁太皇太后梓宮至京師於慈仁寺復得是集蓋太宰撰弘正名家之作起空同訖石川凡十卷合檄餘錄觀之公取裁大旨約略具是矣宜其自運之清迴絕俗也

跋張忠定公修扇紀事

邢太僕書今日已極不易得此扇為內大父張忠定公家藏真蹟可稱墨寶至內伯父小司寇書二十年來斷縑零素亦成珍玩矣尺幅中遂兼二絕

良一快也

跋蕙菴二書

此書乃程工部正夫家鈔本卷首題蕙菴者其自號也前一卷曰大內窺觀者山陰王應遴著程跋中所謂中書舍人王雲來者也後一卷曰大內規制宦官劉若愚所著載勺中志略第十七卷合二書觀之有明大內規模如指掌矣予讀南村輟耕錄見所載楊奐汴宋故宮記陳隨應南渡行宮記不禁黍離麥秀之感盛衰興廢何代蔑有此二書亦何可少乎

三十一

漁洋文卷十二 跋

十五

跋王仲山集

康熙二十年辛酉夏六月梁谿門人劉雷恆震修北來應順天鄉試惠子仲山集及高忠憲公遺書節要時方連雨庭柯增綠叢竹娟好涇川劉舍人子端適送琴魚閔茶屬小疾謝客焚魚啜茗披玩移日

跋故興安知州金公手蹟後

嗚呼此明興安知州復濱金公遺遊擊將軍唐通手書也按公作書為崇禎七年甲戌四月三十日

是時大軍在楚蜀賊入漢南秦督洪公疏所云賊

在平利洵陽間者數萬自巴州通江入西鄉者二
三萬其自棧道犯城洋者又東下石泉漢陰之間
畢會於漢興而旁突商雒秦事大可憂者正其事
也是年八月遂有車箱峽受降之舉三秦潰裂竟
至淪喪嗚呼賊焰方張不可嚮邇名郡望邑所至
瓦解而公以區區忠義之氣激發士民兩全孤城
於百萬虎狼之中及其鞠躬盡瘁猶絳衣大冠降
神睥睨比於伍胥南門之事嗚呼偉哉可不謂忠
乎公歿四十餘年而仲子會公壬戌舉禮部第一
入翰林與子為同官子因得拜觀公手蹟而恭跋
數語其後亦以見天之報施勞臣有以也

跋張忠定公題射鵰圖

張忠定公為叔祖季木考功題射鵰圖一則書畫
之下方此畫今歸淄川王氏子丙寅冬十一月有
事淄川從王氏書齋壁上見之手錄以歸雪夜適
觀此帖輒再手書於末公古文極有法度赤牘跋
尾單詞片語皆有坡谷風致今遺集未刊每念及
輒為憮然如此吉光片羽皆可寶也康熙丙寅嘉
平謹記於樵唱軒時雪夜漏下二鼓

雪二日夜乍晴上嘯臺東望林木蒼茫宛然范寬
倪迂之筆會樵唱軒落成初移筆研几榻燭下作
書寄內兄賓公山中書竟偶錄此詩地爐楮燈
火青熒歲暮風味恨不與賓公同之也

帶經堂集卷五十

漁洋文集卷十二跋

十七

新城王士禎貽上

漁洋文十三

謚冊文 諭祭文 擬碑文 奏疏 紀恩錄 日記

孝昭皇后謚冊文

時官翰林院侍讀擬上

維康熙十七年歲次戊午三月日

皇帝制曰朕惟乾道成能實藉坤元之順君臨作則允資內助之賢故媯水嬪而虞德攸隆洽陽合而姬圖斯永逖觀載籍代著芳徽惟懿德之堪垂爰嘉名之是錫用揚休於彤管庶紀美於青編皇后鈕祜盧氏誕毓高門夙昭令德聿襄宸極正

漁洋文卷十三 謚冊文

一

位中宮淑慎性成早著思齊之譽溫恭天賦允彰克順之休六宮師陰教之修萬國戴母儀之重視龍樓之寢膳色養有加弘蘭殿之慈祥恩勤罔替誠以廣孝每蘋藻之時勤儉以成仁却綺紈而弗御欽承罔斁首薇垣之四星裨益弘多作椒庭之一鑑方謂永資柔淑何期遽邈音徽禕翟長辭珩璜永隔朕躬悽惻臣庶悲哀思道溥而化光儀型錫特以冊寶謚曰孝昭皇后於戲令聞聿彰奕禩頌桂璋之熒芳規勿替千秋垂琬琰之華靈其來

思承茲眷命

諭祭天妃文

時官翰林院侍讀

制曰國家懷柔百神式隆祀典海嶽之祭固有弗
虔若乃明祇効靈示天心之助順滄波協應表地
紀之安流聿弘震疊之威克贊聲靈之濯豈繫人
力實藉神庥不有褒稱曷彰偉伐惟神鍾奇海徼
綏奠閩疆有宋以來累昭靈異頃者島氛不靖天
討用張粵自禡牙逮乎奏凱歷波濤之重險如枕
席以過師潮汐無虞烝徒競奮風飈忽轉士氣倍
增殲鯨鯢於崇朝成貔貅之三捷神威有赫顯號
宜加特封為護國庇民妙靈昭應弘仁普濟天妃
載諸祀典嗚呼坎德合符永著安瀾之績離方作
鎮益彰重潤之休特遣禮官脗修祀事惟神鑒之
諭祭鑲紅旗副都統佐領阿爾虎文

制曰朕惟敵愾疆場臣子旣歿綏而授命垂名金
石朝廷爰加賻以褒忠故戰功曰多聿重司勳之
掌而大烝以祭允隆典禮之文苟臨敵而不有其
身宜闡幽而永傳諸後爾副都統領佐領阿爾虎名
著折衝才優禦侮頃以滇黔不靖負固長沙戕我
人民勞我師旅特簡上將往佐中權奮螭弧以先

登威讐羣醜援枹鼓而誓衆勇冠諸軍帷幄資其
贊勦士卒同其甘苦方欲銘功衡嶽殄逆湘川何
期貔虎之雄才竟遭蛇豕之肆毒大星夜隕櫪馬
皆驚苦霧晨迷跼蹙忽墮壯心弗遂未全消六詔
之烽烟英氣長存猶足開五溪之瘴癘式頒葬祭
之典用賁泉壤之輝嗚呼宣力戎行生作爪牙之
寄捐軀國事歿增箕尾之光靈其來思承茲寵渥

諭祭 太子少保正白旗漢軍副都統徐大
貴文

制曰惟國家戡定禍亂必有將帥之臣克敵果毅
者定厥功故生則享其榮歿則致其哀典至渥也
爾原任 太子少保正白旗漢軍副都統徐大貴早
從征伐宣力累朝方王業肇基已著松杏之績洎
大統旣集式建太原之勲轉戰中州長驅江左兩
浙之鯨鯢克靖八閩之蛇豕潛消屢奏膚功洊登
崇秩引年而退猶殷求舊之懷賈志以終不愧易
名之典用頒葬祭以慰幽冥於戲竹帛永存惜老
成之徂謝綸綍下賁昭恩禮於始終爾靈有知尚
其祇受

擬鑲紅旗副都統佐領阿爾虎碑文

官翰林侍讀作

三初年八
漁洋文卷十三 諭祭文 三

期滅此而朝食使其壯猷克展當銘績於旂常不謂逆孽猶張竟隕身於鋒鏑逖稽載籍死於王事則賞之能執干戈以衛社稷則春秋予之睠懷匪躬之臣爰賁易名之典是用錫之葬祭謚曰敏壯嗚呼白刃可陵知忠心之未泯碧血雖化思烈氣以如生被以榮名足慰貞臣之魄勒諸堅石永激壯士之肝

擬 太子少保正白旗漢軍副都統徐大貴

碑文 官翰林侍讀作

制曰朕撫有寓內凡百爾臣工勤勞王家者朕未

三九四十三 漁洋文卷十三 擬碑文

五

嘗忘其於厚終之典曷有靳焉爾原任 太子少保正白旗漢軍副都統徐大貴久從戎事累立戰功爰自偏裨拔之亞帥念其久勞疆場俾遂引年溘焉告終良用悼惜式命有司子葬祭如禮謚曰勤果嗚呼謚以易名古之制也聞謚知行禮之經也修官之勤致勇之果惟爾有焉用勒豐碑以光幽壤以有聞於來世不其休與

恭請酌定 先師祀典疏

國子監祭酒 臣 王士禎謹奏為恭請酌定 先師

祀典以光 一朝之制度以垂萬世之法守事竊

惟聖莫盛於仲尼禮莫大於祀典故凡受命之君莫不奉以為師崇其秩祀我皇上親政以來丕崇文教臨雍釋奠誠以道隆則從而隆之不拘乎其位也臣考之前代自漢高帝始以太牢祀孔子至唐宋元而隆以王號明成化弘治間尊以八佾十二籩豆雖歷代因革損益不同要以至聖之道歷久而彌尊故崇祀之典有隆而無替其改大祀而為中祀則嘉靖九年張孚敬之議也伏思孔子德侔天地道冠古今堯舜禹湯文武得孔子而道統不絕於見聞君君臣臣父父子子得孔子而倫彝不泯於宇宙自生民以來未有若斯之盛者也孚敬之意不過以孔子生未得位不當舞八佾不知以位言之則孔子非但不得舞八佾并不得舞六佾乃歷代之君相與尊崇之有加無已者以道德不以位也且禮祭從主者以天子而祀其師自當用天子禮樂我皇上文德武功超邁隆古褒崇正學誅斥異端作君作師直接堯舜以來之道統則議禮制度考文以上軼百王下垂億禩此其時矣伏祈 敕下禮臣及廷臣集議 先師祀典籩豆樂舞酌采成化弘治年間儀制俾一百五

十餘年闕略之禮煌然復昭於 聖世尊師重道
之盛典將垂範於無窮矣為此具本謹具奏 聞
請正從祀諸賢位號疏

國子監祭酒 臣 王士禛謹 奏為請正從祀諸賢

位號以重大典事竊惟 文廟之祀從以四配十

哲兩廡諸賢凡以紹述心傳功在萬世也 臣 詳閱

會典諸書竊見從祀諸賢諸儒名號位次尚有未

當有宜一并釐正者敬為我 皇上陳之十哲之

位不稱名而稱子是已但自明嘉靖間議去封爵

之後四科之內稱冉子者凡三殊難辨識兩廡諸

賢諸儒則直書其名而不稱子視十哲何遽懸殊

臣 愚以謂宜將神位俱稱先賢先儒某子之位而

以諱注其旁以昭尊崇之意者也至宋代周敦頤

程顥程頤邵雍張載朱熹六子闡明絕學遠紹洙

泗之傳實超前代諸儒明崇禎間遂將六子改稱

先賢 臣 等竊以躬及聖門者槩稱先賢私淑者槩

稱先儒此以時代論非以造詣論也今既改稱先

賢未敢輕議但位諸漢唐諸儒之上於世次殊有

未安又諸賢諸儒位次會典闕里志諸書所載與

今太學神位互有不同并宜詳議妥確通行天下

學宮著之 本朝會典以垂永久者也伏祈 睿
鑒敕下禮部議覆施行為此具本謹具奏 聞

請增從祀理學真儒疏

國子監祭酒

臣

王士禛謹

奏為請增從祀理學

真儒以光大典事竊惟

至聖之道萬古為昭兩

漢以來諸儒凡發明經傳踐履純正者皆得從祀

兩廡俎豆千秋典至隆也

臣

查現在從祀先儒外歷

代諸儒有功聖門尚有當酌議增祀者敬為我

皇上陳之漢儒功在傳經如書詩春秋三禮授經

諸儒皆已從祀而易獨無之按田何當漢初授易

三十一

漁洋文卷十三

奏疏

八

實為聖門商瞿嫡系此漢儒之當補祀者也鄭康

成博稽六藝所著詩禮諸經百餘萬言史稱純儒

唐宋以來皆列從祀明嘉靖間始以張孚敬之議

改祀於鄉公論久鬱此漢儒之當復祀者也程門

弟子首推尹焞先儒稱其學窮根本德備中和考

其出處本末毫無可議朱子之後推何基為正傳

其學以立志為先居敬為要於大學中庸太極通

書西銘皆有發揮此宋儒之當從祀者也至於明

代理學實肇於霍州學正曹端其學以誠敬為主

力闢邪說薛瑄稱其質純氣清理明心定為有明

理學之冠禮部尚書章懋由博反約斂華就實其
學粹然一出於正難進易退天下仰之國子監祭
酒蔡清學以六經為正宗以四書為嫡傳所著蒙
引尤見窮理之功禮部侍郎呂柟篤志聖賢之道
其講學之要曰文必載道行必顧言左春坊贊善
羅洪先以躬行之實學闡良知之真傳安貧樂道
有箴瓢陋巷之風刑部侍郎呂坤以理學為經濟
有體有用所著諸書皆鑿鑿可見施行以上六人
操履篤實咸有著書發明聖道此明儒之當從祀
者也又絳州貢生辛全生值明末力以正學為己
任著書甚富以時代稍近未敢輕議合無 勅下
該地方官徵其遺書備 乙夜觀覽或亦可仰裨
聖學之萬一也伏祈 睿鑒勅下禮部議覆施
行為此具本謹具奏 聞

請修經史刻版疏

國子監祭酒

臣

王士禛謹

奏為請修經史刻版

以裨文教事竊惟列聖道法之傳莫備於經歷代
治亂之蹟莫詳於史古帝王內聖外王之學不外
經史而畢具矣我 皇上聰明天縱宵旰不遑猶
日 御講筵研精經史又以刊刻經書講議 頌

賜內外諸臣典學之勤雖二帝三王蔑以尚矣查明代南北兩雍皆有十三經注疏二十一史刻板今南監版存否完缺久不可知惟國學版度置御書樓此版一修於前朝萬曆二十三年再修於崇禎十二年自本朝定鼎迄今四十餘載漫漶殘缺殆不可讀所宜及時修補庶幾事省功倍伏祈勅下部議查其急宜修補者早為鳩工俾刊缺悉為完書亦仰裨聖朝文教之一端也至於南監經史舊版并請勅下江南督撫查明如未經散軼即行該省學臣收貯儒學尊經閣中儲為副本於以嘉惠來學未必無補也為此具本謹具奏聞

迎駕紀恩錄

康熙二十八年己巳正月 聖駕南巡視河初八日丙子赴德州迎駕是日抵章丘宿焦進士毓棟所初九日次龍山候淄川唐檢討夢賚同發初十日午次濟南知巡撫錢中丞珏尚未行晚宿馬賽十一日宿平原十二日午次黃河厓途遇總河王少司馬新命知是日駐蹕阜城司馬得旨前行輕裝介馬僉從纔五六人風塵中數語匆匆

而別憶乙丑奉命祭告南海與司馬晤於金陵

得悉皇上躬謁明祖孝陵始末倏忽四載今又以迎鑾之役相遇于此亦奇緣也晚至德州孫

少司馬光祀任少司寇克溥蕭侍讀惟豫田編修需孫檢討勲陳副使洪諫李比部浹前後見過比部邀宿其第聞武定相國李公之芳至十三日早

晤相國遂至四里屯迎駕先是巡撫藩臬諸臣

至劉智廟鴻臚卿承旨令于四里屯候駕諸

臣赴寺報職名畢未刻大風駕至諸臣跪迎道

左上駐馬親詢衍聖公孔毓圻大學士兼吏部

尚書李之芳安好再詢巡撫都御史錢瑑兵部右

侍郎孫光祀等幾時到此皆恭對上又詢按察

使王樑濟東道叅議陳俞侯提學道僉事任塾姓

名籍貫巡撫臣瑑出班以次恭對訖駕行有

旨遣鴻臚卿宣諭臣之芳臣光祀臣士禛三人隨

駕遂上馬扈蹕行上至行宮臣隨衍聖公諸

臣啓奏見朝行三跪九叩頭禮以次恭候聖

安畢上遣侍衛傳問馮大學士何以未來臣之

芳奏聞大學士馮溥有病又問馮大學士原籍距

此遠近臣光祀奏馮溥原籍青州府去德州六百

餘里侍衛入奏又傳問馮大學士患何病臣光祀
奏不知何病但聞行動須人扶掖臣士禛奏馮溥

今年八十一歲大抵是老病入奏又傳問侍郎王

天眷幾時病故係何病臣之芳奏聞在去年五月

不知何病回奏訖良久禮部左侍郎翰林院掌院

學士庫勒納同侍衛三人捧出上尊玉食宣諭

衍聖公孔毓圻大學士李之芳巡撫都御史錢珏

兵部侍郎孫光祀詹事府少詹事兼翰林院侍講

學士王士禛總兵官曹應鵠布政使衛旣齊等七

臣云此皆上用之物因卿等七人昔在京師皆嘗

蒙賜上用酒饌故特頒賜即如常常隨朕身邊一

般臣等啓奏 皇上隆恩異數自來廷臣所希觀

舉家奕世頂戴 聖恩啓奏謝 恩有 旨行

宮門外行禮隨三跪九叩頭謝 恩訖各歸寓更

餘鴻臚卿傳 旨巡撫錢珏與大學士李之芳侍

郎孫光祀詹事王士禛伊等係文職大臣恐在後

擁擠隨駕不及四人可先行在濟南近城候駕被

命即行不及與檢討相聞五更抵曲律店小憩

十四日遲明過平原途遇相國連騎行晚宿禹城

南二十里鋪聞 駐蹕平原縣南七里十五日上

元抵濟南孫司馬約宿其第燈火甚盛邀同行聖
公小集相國宿西關不至是日聞駐蹕齊河縣
晏城鎮十六日卯刻駐蹕黃岡早膳已刻至濟
南府上乘白馬張御蓋黃童白叟夾道歡迎十
餘里不絕臣等跪迎於十王店道左上駐馬大
學士臣之芳奏昨聞皇上有旨蠲免山東二十
九年通省錢糧浩蕩洪恩振古所無臣等及萬姓
均霑實惠云云巡撫臣珏奏皇上蠲免錢糧

上諭臣即連夜通行曉示通省臣民共戴聖恩

上云民為邦本本固邦寧臣等隨於班次三叩頭

三十一

漁洋文卷十三 紀恩錄

十三

謝恩訖駕幸趵突泉入自西門至巡撫公署

觀珍珠泉御書作霖二大字賜撫臣珏由北水

門閱城出自南門有旨巡撫藩臬三臣隨駕

至泰安州臣毓圻臣之芳臣光祀臣士禎送駕

于乾石橋未刻駕至駐馬問大學士之芳年幾

何奏臣年六十八歲又問精神尚好麼奏臣病稍

愈精力覺衰問侍郎光祀年幾何奏臣年七十六

歲問臣士禎何未入京奏臣前以丁父憂在籍

服闋因患怔忡巡撫咨部在籍調理又問今可好

些麼臣奏臣調理已漸好又問幾時入京臣奏臣

再調理好些即入京又問臣奏今歲一定到京

上云都起來罷 駕遂行聞是日 駐蹕張夏是

日與孫司馬別東歸宿王舍店十七日抵章丘十

八日焦氏兄弟留飲觀劇唐檢討亦至出南巡紀

事絕句相示十九日抵家恭捧 御賜薦家廟洎

先祭酒府君几席然後敢嘗是役也往返十有二

日 恩賜上方酒果六種前後蒙 溫旨者四真

異數也至於 六飛所臨老穉歡迎不聞警蹕下

蠲租之詔嚴供帳刁訟之禁交際餽遺之防行在

特設翰林起居注官二員有舉必書尤覓絕中古

以下帝王舉動萬萬也宣付史館自有紀述臣謹

就見聞所及紀實如左傳之世世子孫永誌

聖恩於勿替云正月二十一日前詹事府少詹事

兼翰林院侍講學士臣王士禛恭述

後一年庚午臣士禛蒙 聖恩擢左副都御史一

日於朝班見兵部李侍郎光地言德州 行在宣

賜諸臣後又有 旨召臣士禛入見侍衛傳宣久

之以歸寓復奏奉 旨既回寓罷并記於後

北征日記

康熙二十七年戊辰正月初二日卯刻恭聞

太行太皇太后升遐有 旨 在籍告假丁憂終養

等京官四品已上來京叩謁 梓宮時士禛以詹

事府少詹事兼翰林院侍講學士奉先祭酒府君

諱家居甫禛初四日抵鄒平縣宿張氏晤寶菴兄

弟初五日晚抵章丘縣宿初六日宿還家店去華

不注二里夜雪作尋止初七日早行望華不注雲

霧暮之僅露其趾晚抵禹城縣二十里舖宿初入

日過平原縣晚宿曲律店是日服闋遙拜先府君

初九日次德州飯畢渡河宿景州初十日過阜城

縣宿單家橋十一日過獻縣河間府河間縣宿新

漁洋文卷十三 日記

十五

鍾驛逆旅壁有予舊題絕句毘陵毛端士有和作

頗致聞聲之思十二日過任丘縣昔奉 使祭告

南海與今副都御史鄭公山公憩邑中李氏園令

鄧君文源來謁能吏也過趙北口晚宿雄縣公孫

瓚易京也瓚與子續書曰素氏之攻狀若鬼神衝

梯舞吾樓上鼓角鳴於地中今有易京樓十三日

過白溝河新城縣宿三家店得同年前祥符令毛

會侯書十四日過涿州琉璃河晚宿良鄉縣十五

日四更起行晨過盧溝橋范石湖詩草草輿梁枕

水低今石橋金明昌中造也辰刻入彰義門隨赴

吏部報名尚書說巖陳公侍郎容齋李公南溟張公邀飯火房飯罷入朝坐班午門外晚宿趙編修伸符舍十六日晤同年前兵部侍郎孫公怍庭孫以初二日行先予至十七日孫光祿孟滋邀飯十八日聞前左都御史蒲州杜公之訃公清忠恪慎始終一節卒年七十三予辛卯座主也十九日二十日出東便門齋宿相國武定李公過訪二十一日黎明上親祭梓宮諸王大臣已下皆就列哭奠如禮先是上欲行三年喪諸王大臣言官交章數十上上勉從之是日釋服二十二日

二十三日移寓相國李公邀飯二十四日仍出東便門齋宿二十五日黎明上親祭梓宮畢

駐蹕城外二十六日前相國益都馮公前刑部侍郎高公念東至二十七日左都御史徐公健菴邀飯滄清吳太學卜雄來執贄二十八日兵部侍郎張公箸漢邀飯怍庭在坐副都御史鄭公山公見過貽所刻文選彙注聞會試展期十日二十九日李戶部厚餘邀飯二月初一日晤前副都御史吳公銅川於慈仁寺潛江朱載震悔人仁和湯右曾西厓治具邸舍二君成均門生也漢陽姪戩孟穀亦

至初二日門人李比部文遠伯舍邀飯上海王孝廉原來就贄初三日門人衛比部台瑞凡夫治具邸舍故相曲沃文清公子候官藍漣公漪門人海寧查嗣璉夏重嗣琛德尹秀水朱昆田文益與朱湯王諸子畢集乙丑歲奉使南海與藍別於廣州藍工畫能詩初四日仁和王丹林來鴻臚卿怡齋劉公邀飯初五日晤前少詹學士涓來兄至自金陵初六日吏侍李張二公邀飯初七日兵部尚書蒼巖梁公邀飯初八日陝西督學許僉事生洲寄石墨鐫華泰州朝邑諸志初八日初九日大冶相國

罷既聞武定李公亦致任初十日忤庭歸里以翰林簡討衛爾錫既齊為山東布政使衛漪氏人在詞林建言謫判霸州政為三輔之最以外艱歸

上巡幸畿內庶知之丙寅秋 特諭原官起用至是服闋入 朝遂有是 命伸符編修邀飯謝比

部方山在坐十一日晤同年前工部尚書杜公肇余自浙至晚邀南海梁藥亭佩蘭宣城梅耦長庚飯二君故人也以公車至侍講學士彭公羨門以

太皇太后輓詩見示凡夫以其先文清公文集來屬序十二日同年前左都御史徐公立齋邀飯長

椿寺同集者相國馮公刑部侍郎高公令兄健菴
都憲是日聞兵書真定梁公入相容齋擢工部尚
書晤同年前兵部侍郎楊公以齋自浙至十三日
或問蟹舍二字所出按說郛有蟹略四卷中螿鄉
一則云蟹澤蟹洲螿浪螿穴蟹塚蟹窟蟹舍高似
孫有松江蟹舍賦十四日閱李川父嵩渚集游盤
谷記云愿行實無考新舊唐書列傳皆無之按愿
即西平王長子歷官河中等五鎮節度使卒贈司
空唐書有傳川父號稱博雅何疎於考證如此聞
故友武進董侍御玉虬之訃董晚注三禮成癸亥

歲曾寄予數篇故工部尚書湯公潛菴撫吳欲為
奏進未果永城李孝廉灼然介冉覲祖來執贄冉
字永光中牟人先考功兄癸卯所取解元也是日
禮部啓奏叩謁 梓宮在籍諸臣自大學士馮公
已下十五人其大學士杜公已下八人先到京者
竟未啓奏蓋先到即隨朝班陪祭反忽之 十五

日赴吏禮二部請為啓奏同至者前左都御史劉
公魯一遷安人年七十七矣聰明如少壯人家藏
弄書画鼎彝之屬最富世號精鑒朱檢討竹垞過
訪攜示唐撫言足本凡十五卷宋嘉定中柯山鄭

昉刻也又言倪檢討雁園嘗得宋刊十家宮詞雕
版極工王建詩太平天子朝元日宋本作朝迎日
亦新異可喜竹垞近著日下舊聞三十卷覈而博
屬予爲其序嘉善陳鉞投詩五十韻故人子更之
子十六日念東歸里晤銅川中丞語皆田園丘壑
銅川沁州人好古博雅以兵部左侍郎張公著漢
知貢舉時三宗伯為言官論列用兵部非故事也
主考官大學士宛平王公左都御史徐公健菴兵
部右侍郎成公愚崑左副都御史鄭公山公也吳
舍人冰持邀飯桐城人同年河南督學五厓之弟

坐中談浮渡山之勝十七日晨雪作尋止前內閣
學士韓公元少見過云即日南歸銅川中丞過訪
流連話別云亦以次日西歸矣竹垞見借宋僧文
瑩玉壺清話十卷其第九卷為南唐李先主傳云
吳檢討志伊著十國春秋引書數十種獨未及此
十八日工書李公容齋邀飯在坐者涓來詹學前
工部杜公辭不至布政使衛公爾錫海寧陸處士
冰修先後過訪冰修臥病都下將附兵侍楊公舟
南歸宛平姪源以古文來質史論簡嚴不減少游
後來一作手也十九日謁竹垞求撰先祭酒府君

墓碑程舍人松臯邀飯故太常卿其相先生子錢處士飲光在坐述將樂玉華洞之奇同鄉馬右實鹿芝陽二侍御邀飯聞以刑書張公素存為兵部尚書二十日門人宜興陳枋貽其從叔其年檢討遺集其年弟安平令宗石刻此集屬予序請至再三未暇報也聞以少詹學士慎菴弟為內閣學士兼禮部侍郎晚程送冰修以齋留飯至夜分夏重德尹在坐二十一日禮部啓奏得旨回籍晤前奉天府府丞姜公定菴自浙至二十二日竹垞與姜徵君西溟見過西溟出示遊上方山詩李編修紫

瀾邀飯馮舍人大木在坐是日有旨大學士杜公馮公 陛見二十三日方山邀飯紫瀾大木伸

符在坐讀鄉前輩許襄敏公贈岳蒙泉詩有云道上鈎衣蒼耳子風前聒客白頭翁公詩世不多見此殊可誦夜歸作悔人詩序燭屢見跋漏下四十刻矣二十四日門人安邑丞陳奕禧子文寄司馬文正公集及所著臯蘭載筆益州子役記子文工詩善書浮湛下僚九載予報書云譬噉諫果當是餘甘回齒頰時矣竹垞邀飯古藤書屋食鮑魚半翅甚美觀米氏研山峰巒潭洞甚奇有寶晉齋三

篆字襄陽米氏世珍印云其曾大父文恪公得之
新安許文穆公家悔人凡夫德尹伸符孟穀在坐
令子文益是日南歸二十五日過慈仁寺市買得
舊刻山海經交泰錄二書涓來詹學見過話別令
子子重吏部過別贈爐扇蘭亭婁縣姜遴上海
俞麟徵東陽李鳳雛來執贄西溟凡夫大木悔人
孟穀先後至容齋尚書魏贍辭不獲受一卮晚相
國馮公使來約以明日行是日公同寶坻杜公
陛辭各賜綵幣五表裏 本朝閣臣愚禮始終如
二公者不多見也二十六日凡夫復至魏贍不受

源洋文卷十三 日記

三十一

右實伸符悔人德尹孟穀來遂發晚宿寶店馮公
先至二十七日過涿州訪前司業鍾山劉公不遇
予昔官祭酒與劉共事者四載晚宿新城縣過馮
公寓述昨 陛見既出 傳諭問向服至寶丹否
對曰臣向實服之今不服數年矣亦不測 上何
以知之也二十八日大風晝晦過雄縣宿鄭州廢
城唐莫州宋鄭縣也邢子顥三郡記云顥頊所造
順治壬辰乙未間公車經此鞠為茂草今萬瓦鱗
次矣二十九日大風過任丘縣車中讀素宏漢紀
永初五年謁者劉珍上言皇太后宜入宗廟交獻

事下公卿僉曰宜如珍言明年正月太后初親祭於宗廟與皇帝交獻大臣命婦相禮儀竊歎漢庭公卿多明經術何無一人執奏折其非者宋薛簡肅公一言章獻后遂不入太廟度越漢公卿遠矣晚宿河間府夜微雨尋止三十日風息過獻縣宿富莊驛三月初一日早行過阜城縣景州宿劉智廟得家書初二日遇鍾山司業班荆數語而別過德州唁督糧道胡少參智修座主故吏部侍郎宛委公子也晚宿平原縣分巡兗東道李僉事浣廬見過縣令李瑤來故相國高陽文勤公從子也初

三日過禹城縣始見柳花杏花衛河以北所無也午後微雨晚宿馬寨初四日馮公將注灤口晨詣別行二十里望見離山亦曰嶧頃之望見華不注山二

山空青縹緲如尹邢相照濟水間之齊城水有二派城中明湖水出水門合趵突泉水北流經灤口入大清河是為灤水亦曰濟水城東門外歷泉水合南山諸水經華不注東流入小清河舊設七十二閘歷章丘鄒平長山新城高苑博興樂安諸縣入於海自劉豫堙小清故道久闕今湖水出水門七分北流三分東北流其東北流者至雙橋閘合

歷泉水至華巖宮前北流亦入大清河自水門舟行尚可達華不注三齊記云歷水出歷祠下泉源競發與灤水同入雒山湖是也晚宿十里鋪在龍山西初五日過章丘縣經澚山灤漁舟十餘往來水雲間湖中有墨王亭晚至鄒平縣宿寶菴齋中初六日已刻抵舍是行程返凡六十二日

紀琉球入太學始末

康熙二十三年冊封琉球翰林院檢討汪楫中書舍人林麟焟等疏言中山王尚貞親詣館舍云下國僻處彈丸常慚鄙陋執經無地嚮學有心稽明

洪武永樂年間常遣本國生徒入國子監讀書今願令陪臣子弟四人赴京受業云云事下禮部部覆史載唐貞觀中興學校新羅百濟俱遣子入學琉球自明初始內附會典載大琉球國朝貢不時王子及陪臣之子皆入太學讀書禮待甚厚又載洪武永樂宣德成化間琉球官生俱入監讀書今該國王尚貞以本國遠被 皇仁傾心嚮學懇祈使臣汪楫等轉奏願令陪臣子弟四人赴京受業應准所請聽其遣陪臣子弟入監讀書云云時子為祭酒咨覆禮部略云查太學志載洪武二十五

年秋琉球國遣其子及陪臣之子日孜等入監命工部給羅絹為秋衣冬琉球中山王遣其舅仁悅慈等至永樂二年琉球中山王從子三五良疊等九人以謝恩至奏請入監給賜一如洪武中故事令工部建王子書房於監前以處之三年琉球山南王遣寨官子李傑至四年中山王遣寨官子石達魯等六人至其後李傑石達魯等每在監三年得乞歸省九年中山王遣王相之子懷得寨官子祖魯右至十一年遣寨官子周魯等三人至是年有奏歸省者命禮部厚賜以榮其歸是後乞歸省

或命候其使者還國以行永樂以後至於正德常

三四遣嘉靖五年中山王遣官生蔡廷美等四人

至十一年歸國十七年遣梁炫等四人至二十三

年歸國尋又遣蔡朝用等五人至今在南雍處以

光哲堂歲時給衣物如例嚮慕文教琉球於諸國

為最篤國家待之亦為最優云康熙二十七年琉

球國王遣耳目官魏應伯等恭進朝貢方物又遣

陪臣子弟梁成楫鄭秉鈞阮維新蔡文溥等四人

同貢使赴京入監讀書於正貢方物外敬加屏風

紙三千張嫩蕉布五十疋三十一年成楫等乞歸省

例 詔同貢使歸國仍 命禮部 賜宴給賞如貢使

帶經堂集卷五十一

世

漁洋文卷十三 紀

三五

帶經堂集卷五十二

歛門人程哲校編

新城王士禎貽上

漁洋文十四 山錄 小志 凡例

長白山錄

長白山在濟南鄒平縣西南本屬長山縣縣所得名也高二千九百丈周六十里晏謨述征記曰山巔雲雨常白故又名常白司馬子微洞天福地記第六十一長在山在齊州長山縣故又名長在抱朴子曰長白泰山之副岳酉陽雜俎曰古肅然山也史記封禪書元封元年四月乙卯封泰山丙辰

漁洋文卷十四 山錄

禪泰山下趾東北肅然山今以地理考之山在泰

山東北相距三百里安得乙卯封泰山丙辰禪肅

然若是速耶金史云肅然山在萊蕪縣萊蕪古羸

地在泰山東百二十里封禪書之言信矣按長白

山見諸史志者魏書在東魏郡博平縣劉宋僑置

縣也隋書在章丘縣金史在章丘長山二縣唐元

和邳縣圖志屬淄州長山縣宋太平寰宇記屬齊

州章丘縣今則連峰沓嶂跨四縣之境北去鄒平

而近東北去長山而遠西章丘南淄川實海岳之

輿區仙靈之窟宅今撫其著者略見於篇

會仙峰山之最高峰也形若覆敦上有金母祠
上書堂在峰之南有書堂寺寺門巨石環抱如屏
西有范公泉相傳宋范仲淹讀書處

貓頭後猓二峰一在書堂西一在書堂南
南向東折曰蘿谷最險峻盛夏積冰雪

又東南曰摩訶峰高與會仙峰埒上有浮圖精舍
其北大壑限之東曰回路谷德會水出焉

又南曰桃花谷曰種金頂曰水尖頂

太湖山在長白之南上有石室及敗漆船記云堯
時物

右長白南嶂

老人峰在會仙峰之東其人多壽又名黃鵠山

鍛砧峰形如鍛砧亦名印臺山

于茲山與長白斷而復連上有于茲仙翁祠

右長白北嶂

長白兩嶂之間曰大谷谷有二十四村土沃而泉
甘嘉木美箭蘂靡若鄧林

象山 松山俱在谷中

柳菴在大谷西最深處臨黛溪即應會水也竹林
檀閣煙鳥雲林所謂幽幽釋子眇眇禪棲者矣

黃鵠菴

生生菴

會仙峰北有望湖頂下見澍山樂

魯泉在望湖頂下林壑清美泉水允甘有成氏別業

唐李菴在魯泉西北二里古有唐李二仙得道於此

玉泉菴亦有甘泉

朝陽菴與唐李菴表裏相背

九龍山會仙峰北來之支也其峰有九如神龍蜿

二五十四

漁洋文集十四 山錄

三

蜒至澗山樂而止掉尾穹脊昂首奮鬚形容酷肖山北孔道曰搭山道曰啞婦口

大谷越嶺而西曰巒山亦名巒堂嶺圖經云鄭康成刊注詩書之所生細草葉形似韭俗謂鄭公書帶草金元好問濟南行記云鄒平縣南有長白山范文正公學舍在焉故又謂之巒堂嶺太平寰宇志云巒山在淄川縣東北十里三齊要記云鄭康成刊注詩書日棲遲於此當以寰宇志為正

西為鵬鶚谷

又西為鳳凰山中有迦谷有翔鳳菴

醴泉寺在鬻山北宋范希文斷壘畫粥之處公常於寺中得窖金覆之今寺有范公祠南向有寶誌公石像刻碑北向碑陰有唐人文字鬻缺過半按史及神僧傳寶誌行游之地皆在建康長白乃拓拔魏地而唐碑云陸倕製銘於冢內王筠勒碑於寺門題署直云誌公之碑何據邪又洛陽伽藍記載後魏有沙門寶公者能預覩三世胡后問以世事寶公把粟與鷄喚朱朱後為朱榮所戕或是此寶公未可知也若爾則應稱寶公不應稱誌公也

富相山在魯泉東北有乳泉色白宜茗山下遠近多紅葉

景相公山在富相山東下有後周中書侍郎景範墓墓上有碑

黃山在城東南三里與于茲山南北相望上有碧霞宮

翠微遐景二亭皆元安處士所建

山陰為兔柴明右都御史張公別業有超然洞洞中有白兔公銅像上有挹翠亭半偈山房西佳樓禮部尚書董其昌作兔柴記

李氏嘯園在長白山之陰修竹萬挺有來霞閣俯臨潔溪是東谷先生張茂蘭故居

繡江源出長白山南百脈泉元好問詩長白山前繡江水展放荷花三十里看山水底山更佳一堆蒼煙收不起濟南行記云繡江發源長白山下參佐張子鈞張飛卿觴予繡江亭漾舟荷花中十餘里樂府皆京國之舊

漂水即楊緒水源出長白山之陽俗曰獺

德會水出摩訶峰下齊乘曰蒙水俗曰沙河

魚子溝水水經注瀧水至梁鄒東南與魚子溝水

三萬里
漁洋文集十四山錄

五

合水南出長白山柳

或作柳

泉口即陳仲子夫妻之

所隱也北流注於瀧水

魚子溝曲流至黃山南如月半規曰月河多水竹

張氏別業

醴泉在寺東山麓有亭久廢先曾祖司徒府君題名石碣尚存

澗山樂在九龍山西醴泉寺北中多芙蓉蘂菱芡芡蘆魚蚌之產漁舟虎落交於山麓周迴三十里蓋漂水之委也灤中有墨王亭乃族祖洞庭別業

其人物於陵仲子願野王輿地志云齊城西南百

五十里有長白山陳仲子夫妻所隱處太平寰宇志引之按山在齊城東北非西南也唐張說詩昔聞陳仲子守義辭三公身賃妻織履樂亦在其中豈無窮賤苦羞與傾巧同長白臨江上於陵入濟東我行弔遺跡感歎石泉空

唐長白山人郇貞一武氏革命終身不仕見唐書元張臨字慎與讀書長白山號長白先生明都御史張公延登作長白先生祠記

處士安仁甫隱居黃山

仙釋毛真人司馬承禎云長在山在齊州長山縣

漁洋文集十四

山錄

六

毛真人治之

白兔公唐韓翃送齊山人歸長白山詩舊事仙人白兔公掉頭歸去又乘風柴門流水依然在一路寒山萬木中

于茲仙翁

酉陽雜俎長白山相傳古肅然山也峴南有鐘鳴南燕世桑門惠霄者自廣固至此峴聽鐘聲稍前忽見一寺門宇炳煥遂求中食見一沙彌乃摘一桃與霄須臾又與一桃語霄曰至此已淹留可去矣霄出回顧失寺至廣固見弟子言失和尚已二

年矣

又云長白山西有夫人墓魏孝昭之世搜揚天下才俊清河崔羅什弱冠有令望被徵詣州夜經於此忽見朱門粉壁樓臺相望俄有一青衣出語什曰女郎須見崔郎什悅然下馬入兩重門內有一青衣通問引前什曰行李之中忽蒙厚命素既不敘無宜深入青衣曰女郎乃平陵劉府君之妻侍中吳質之女府君先行故欲相見什遂前入就牀坐其女在戶東立與什敘溫涼室內二婢秉燭呼二婢令以玉夾膝置什前什素有才藻頗善風咏

三芳字七
雖疑其非人亦愜心好也女曰比見崔郎息駕庭樹嘉君吟嘯故欲一敘玉顏什遂問曰魏帝與尊公書稱尊公為元城令然否女曰家君元城之日妾生之歲什乃與論漢魏時事悉與魏史符合言多不能備載什曰貴夫劉氏願告其名女曰狂夫劉孔才之第二子名瑤字仲璋比有罪被攝乃去不返什乃下牀辭出女曰從此十年當更相逢什遂以瓊瑁簪留之女以指上玉環贈什什上馬行數十步回顧乃一大冢什屈歷下以為不祥遂請僧為齋以環布施天統末什為王事所牽築河於

垣冢一作塚遂於幕下話斯事於濟南奚叔布因下泣

曰今歲是十年可如何也作罷什在園中食杏唯

云報女郎信俄即去食一杏未盡而卒什十二為

郡功曹為州里推重及死無不傷歎

又云平原縣西十里舊有杜林南燕太上時有邵

敬伯者家於長白山有人寄敬伯一函書言我吳

江使也令我通問於濟伯今須過長白幸君為通

之仍教敬伯但於杜林中取樹葉投之於水當有

人出敬伯從之果見人引入敬伯懼水其人令敬

伯閉目似入水中豁然宮殿宏麗見一翁年可八

三十九字

漁洋文集卷十四 山錄

八

九十坐水晶牀發函開書曰裕興超滅侍衛者皆

圓眼具甲冑敬伯辭出以一刀子贈敬伯曰好去

但持此刀當無水厄矣敬伯出還至杜林中而衣

裳初無露濕果其年宋武帝滅燕敬伯三年居兩

河間夜中忽大水舉村俱沒唯敬伯坐一榻牀至

曉著岸敬伯下看之乃是一大黿一曰龜也敬伯歎刀

子亦失世傳杜林下有河伯家

大唐齊州章丘縣長白山醴泉寺誌公之碑

闕二京大薦福寺奉敕闕一慶闕綴文沙門玄傘闕五

薦福寺闕二翻經院校勘沙門正智寺都維闕僧

道寂建此寺

關一十

曇花未出庸詎知寂滅之名覺日猶關一曷嘗識

苦空之相關一夫金儀下降舍靈關一淨月之光寶教

旁流關四雲之潤三車關一駕關二十化工關三香不息所

以化身周流於別土神關三於塵沙或十大聲聞駐

形關二一萬菩薩納景涼臺觀關一背嶺以宣慈清辨

起關二十未掩白足關二佛法之關三月關一咸關一王城

之舍蓋關一生關一道關一境發關一若不人關一具關四諦幢

高關一者與今此醴泉寺者是宋齊關二十經文師即

身之菩薩關一遊神境來屆茲山棲託巖阿聿修

禪寂以為此地玄武之分青龍關四首以開疆據天

齊而劃野却關二十尚父之關一居九合一匡齊桓公

之霸國爾其常白山者迺摩天關一地晦映蔽虧抱

泉石以娛神出雲霞而養性山毛地髮名花將軟

草連芳關二十人關二繪關二形勝關二招提自後七級

崇圖關一起舍佉之才五層關一重標戰勝之門海

目山亭妙相彈於變態虹梁鳥革大壯關三綵畫關二

塵凡關二香關一水調八斛之關一風關一五音之說息心

之輩見流注以超昇迴画之徒仰幽關而悟入時

逢關一代屬關三金林玉關一寥落幽巖我國家灌頂

四天纂圖千帝以佛乘為馬用道品為城郭八

方起塔闕二道形九闕一聚鹽情殿闕三佛闕二此精廬

闕一通堯日三齊族姓向梵境以翹誠四履闕二仰釋

天而矯首又屬中宗孝和皇帝龍興漢道馬入天

經闕二十周法界去景龍二年歲次景子爰有齊州

正智寺都維僧仁万俗姓李字道寂慨茲墮墜抗

表闕一宗天鑒至誠特賜名闕三十否而還泰山靈掩

以重開法俗歡康人神之悅初師之行進表也夢

乘船上山及翌闕一赴朝所月無礙豈非與廢闕一定

通闕一懸期闕二十倣裝東上將闕二州闕三三藏義淨法

漁洋文卷十四 山錄

師各代高僧天下重德先奉敕於大薦福寺闕三律

以闕六勝緣闕一城在東倍增闕二十四闕一降靈五闕一德

人天之表名揚宇宙之間聖闕一難闕一神功叵測

及將命星發載達京闕十時有闕三十身闕二輟絃歌歲

即闕三以二月八日親率闔境老幼大會新寺表慶

天恩又於闕二之闕一尊卑就列雁行齊聽闕三十忽見

有醴泉闕四三四尺深淺三尺餘色淨味甘爰符瑞

典挹酌同飲咸覺蠲疴豈不以闕一福闕一圓闕一三靈允

答光揚寶闕一滋液金場故闕二十上聞闕二垂感有敕

改名為醴泉寺仍更抽入冊九僧住持行道自玄

波再委王題重開日殿赫而昇月宮華而桂滿

若乃八海精勤以齊深戒月澄空密霧禪燈

焰室巧避輕風濯之龍洗毗之鳥眼長祛

五住遠効四心刷鴈以飛雲轡捨生之地

續桂有情根軌足方鳴金鼓功不朽流福

無窮斯並先帝之本顛症嚴法師幽贊威神之所

致也又師遊戲生死儼如親對即平時所

將黑大亦綦具無願不從迺至有患心痛

者但取廟前少土和水服之應時便愈遺形是託

神靈保持由是梁寺史傳師本俗姓朱氏金

四子五十三

漁洋文卷十四 山錄

十一

城人也少出家道林寺僧儉法師為和上業存

禪宋太始初漸彰異迹居止不定飲食無時長

髮跣足每詞同讖記言不虛發應驗如神或

視通於北分形遍於南國奇怪忽恍不可殫

論以天監十三年歲次甲午十二月八日相

奄然示終時有異香芬馥特勅厚加殯送葬於

鍾山獨龍阜仍於墓所開善精舍勅陸倕製銘

於冢內王筠勒碑於寺陰生及其去也以精

靈度物哀憐庶類福祚皇王且彼託鍾山此依常

白彼葬龍阜此龍臺前王挹風建開善之墳

後帝傾關二禮關三至令大唐太極元年歲次壬子

皇帝御天下之三載凡一百九十九年化化之緣

古今無盡明明之德日月彌新其所變現之梗概

關二十之關衆所未諒恭敬者隨時受福疑慢者應

念立徵事迹繁夥不可備載當嘉聲上徹先帝令

左臺監察御史宋務先親加檢覆關二十八正所以

知歸一屬關緣獲未曾有關二復命倍沃天心刺史

楊元禧分符北極露冕東藩關雨逐於行車仁風

隨於轉扇黃金關二十追鳥跡於上乘想關六繩寶地

關動天宮薦瑞香園延光帝載縣丞主簿縣尉關一

四十七卷
漁洋文集卷十四 山錄 十二

舍關四十羣物揚舲彼岸錄事關二鄉關一等門滋蘭

關四牙忠信滿於州閭因果關於關四虔命關一奉關三十

九池荷於津通貝樹披春帝王之遺文秩矣金關三

諸佛之正道通矣迷津關路菩薩運載之乘行矣

關八之關二十況玄天大造充溢於盡空淨域鴻緣關

籠於無外昔迦關三如來垂讚歎之關彌勒當關三表

歌揚之偈若稽古訓式樹關碑仍於關二十銘曰義

天兆味優花未披但迷五蘊孰辨三伊關二火宅耀

我金儀神足繼軌關揚旌關一有關成觀方關二載

表靈關三開關二十網燬我寶地壞我金場花殘鷺沼

煙輟龍香霞標歎滅石徑荒涼三萬寓乘皇千齡

纂帝日月連關一飛行關一契關一念新關五高關八精

標五門玉墀倣感銀關一輿存其五欲赴天泉關一規

國德寄誠墳廟傳詞翰墨瑞醴通流嘉祥允塞重

先佛關二題宸極其六紺軒關二十沙其七先帝聖靈聿

資神境冥扶默贊分形散影既墓彼山又墳茲嶺

寶鐸雙振金繩共炳化關三真身永永其八功關一泉關一

天關二十宣聞諸典故鑿金鏤玉道該緇素式讚王

猷關三淨度勒像賢劫刊碑覺路其十

開元三年歲次乙卯二月己酉朔十五日癸亥下

漁洋文集十四 山錄 十三

大周故銀青光祿大夫中書侍郎同中書門下平

章事上柱國晉陽縣開國伯食邑七百戶贈侍中

景公神道碑銘并序

翰林學士朝議郎尚書水部員外郎知制誥柱

國賜緋衣袋臣扈載奉勅撰

翰林待詔朝議郎守司農寺丞臣孫崇望奉勅

書

帝軒轅乘土德之運其臣曰奢龍祝融能辨方域

以制區夏帝媯氏禪陶唐之基其臣曰伯夷后蔓

能典禮樂以和人神上古佐命之道關五焉三政嗣

與圖史寢盛彌綸輔翼代有其人皆金策丹書絢績功業垂其訓聚而為墳典形其美流而為歌頌

陋篆籀之質略我則潤之以關五之淪朽我則鏤之

以貞珉銘以紀功碑以誌行千載之下粲然可觀

者其惟神道之表乎故中書侍郎平章事景公諱

範皇朝元佐字關二顯德二祀冬十一月薨于淄川郡

之私第天子廢視朝軫殲奪之念制贈侍中遣使

贈真飾終之典優而厚字關二詔詞臣字關一文字關琰盛矣

矜于名氏誠未顯于邦家與夫輝煌帝恩導揚休

烈字關八者可同日而語也字關六綸有直而敘之用不顯

我大君之命臣聞景氏之先出于芊姓從楚王于

夢澤差字關一侍臣畫漢字關于雲臺丹推名將濟美垂

清惟公故里夫嘉遁絕世高臥于是者足以字關一顯

氣而為字關七生于是者足以字關三而為世傑故公之

先由烈考太僕府君之上曰王父賓大王父閏皆

貞晦不仕介享天爵而巢許字關十仲曰篆公字關四

天下也本之以仁義制之以經籍是謂人文是謂

世字關二聿登相位而申甫之祥著矣昔者聖人之教

天下也本之以仁義制之以經籍是謂人文是謂

人關六以關一開物成務者關四所於此關二以公輔之

位必由稽古升廊廟之才必以經術顯而公以明

經擢第於春官氏則賢哲之關六為吏於清陽關十掾

於高密郡秩滿而關一授范縣令大鵬之翼關十北溟

以未舒蟄雷之聲關一殷南山而不關一然則關七子之關十

通人之才變而順則方圓之量不能局故公之佐

縣政也人謂其勤且潔矣典刑書也人謂其關八邑

恪關一以關八使關一政關一而從入者則人謂其賢且能

矣粵若日月之彩得天而大明風雲之期遇屯而

勃起關十磻關一璜關十我大周聖神恭肅文武孝皇

四子去

漁洋文集卷十四 山錄

十五

帝建大功于漢室為北藩於魏邦初筮既開得賢

斯盛於是我公關九而君臣之關九龍飛在天躬戴曜

靈至於霄極皇業肇建制以公為秋曹郎進階至

朝散大夫而關九萬關十之樞惟聖人執左契臨萬邦

經久制大命日政之機國之大柄總於樞務者可

謂重矣而公關九忠而賢關十公為左司郎中充樞密

直學士尋轉諫議大夫克職今皇帝嗣位之時登

用舊臣而并人乘我大器擁衆南寇親征之舉迺

若奔雷分命大臣保釐關七于公仍拜貳卿關九振帝

伐張黃鉞白旄殪羣兇而皆盡參旗河鼓導清蹕

以言旋大侵既已平九服又已定關四時惟輔臣而

公昌言可關八聖謨碩望可以鎮流俗爰立之命帝

心允孚六府肇修兵賦元大邦之調用關五公自立

不回信而有守關十哉大用逢時洪鈞在手資忠孝

於君父享富貴之崇高而盡悴之勞因成美疢封

章疊上優詔褒稱聽解利權關七專關七以列卿歸

第懸車故鄉嗟風樹之忽驚訴昊天予何極見星

而注夕露方多泣血以居晨漿屢絕哀與性盡臥

疾而終享年五十有二關七觀夫公之行事則其道

也淳而粹克克焉無能稱其言也直而肆謇謇焉

四〇七

漁洋文集卷十四 山錄

十六

無所忌耿介以自立強幹以自關一故其仕也關一

命之卑關三三關六无悔吝古人之操何以尚也秉筆

者得無愧於辭矣許國夫人李氏嗣子太廟齋郎

儼信等關三靈關一光關二烝嘗翼翼賢人關九子事終

之禮佳城閉日長楸篲雲勒銘垂休以示千古其

詞曰

長白蒼蒼溜水湯湯哲人之生逢時會昌哲人之

逝魂遊故鄉關一高山兮我峨逝水兮驚波關一而關一

死關十山有頽坂水有高岸人何世而弗新善有名

子獨遠猗歎公子時用丕顯

顯德三年歲次丙辰十二月己未朔十日戊申
長白山有明僧宗泐詩帖凡古今詩十五首自題
云持盜過長白宿劉老別業書之永樂二年九月
天台釋宗泐李滄溟跋云此長白名蹟也按泐季
潭以胡惟庸之獄連染免死發隍槎峰與做散僧
渡江至江浦石佛寺示寂事在洪武中而此署永
樂二年謬矣

明戶部尚書邊貢詩朝望長白山暮望長白山山
色有朝暮吾心常自閒

崧少山人張鯤石刻絕句在醴泉寺范祠危閣煙

三五六

漁洋文卷十四

山錄

十七

霞出峰簷麋鹿來春泉落西澗聲遶讀書臺風書
谿楊色煙春崑蕙香人言背絕壑纔是上書堂山
護埋金窟泉通畫粥廚傳經衣蓋在常伴老龍圖
靈刹羣峰合名祠半日游難逢浮海術易集下山
愁按鯤釣州人今禹州官副使嘉靖十三年刻

古栗老友碑明都御史張公延登書在黛溪側

隋來整榮國公護兒之子驍勇善撫士衆討擊羣
賊所向皆捷時孟讓王薄衆十餘萬據長白群賊
歌之曰長白山頭百戰場十五五把長槍不畏
官軍千萬衆只怕榮公第六郎

廣州遊覽小志

光孝寺

光孝寺又名法性寺在粵城西北越王建德故宅也孫吳虞翻居此手植訶子因名虞苑

又名訶林

東晉隆

安五年罽賓國曇摩耶舍尊者駐錫曰王園寺劉宋永初中求那羅跋陀三藏始創戒壇梁天監元年智藥三藏自西竺來植菩提樹壇前預識曰後一百七十年有肉身菩薩於此樹下開演上乘達磨初入中國亦止此寺其後五傳至惠能遂開東山法門於此今祝聖殿曇摩遺跡也有米元章書

三才字

漁洋文卷十四 小志

六

三世佛名稍北為六祖殿前為菩提壇側為髮塔其東南為達磨井西為五祖殿循廊而東為風旛堂堂前有池泓然又東有偽漢鐵塔上有題記稱大漢皇帝大寶十年四角有沙門某某題名繫銜皆金紫大夫檢校工部尚書又東為譯經臺洗硯池房融筆授首楞嚴處西廊復有一塔規製差小題玉清宮使德陵使龍德宮使開府儀同三司內侍監上柱國龔澄樞同女弟子鄧氏三十二娘及大寶六年歲次癸亥字粵城內外古道場以光孝為第一氣象古朴殊乎他刹六朝已還名僧居

此者曇摩耶舍求那羅跋陀智藥三藏初祖六祖

印宗法師波羅末陀

陳刺史歐陽頴請譯佛阿毗曇經金剛般若經無上依經佛性論共四十部

般

刺密諦

譯楞嚴者

仰山通智禪師憨山德清法師天然

函昱禪師同遊黃太史忍菴高廷評謾園屈翁山
陳元孝張超然三處士程燕思秀才人賦五言詩

六榕寺

淨慧寺舊名寶莊嚴寺蘇長公南遷過此書六榕
二大字因名六榕寺今寺額即蘇書也寺有舍利
塔梁大同中沙門曇裕建舊有唐王勃碑宋紹聖
間寶雞主簿林修重建宗室康州刺史叔盎撰文

三石名

漁洋文卷十四

小志

十九

塔九層高二十丈廣六丈有奇中藏佛牙舍利當
修重建時掘得巨鼎藏劍三鏡一同舍利瘞之元
至正間又增寶珠銅柱之屬憑高眺遠則白雲粵
秀諸峰皆在襟帶也寺有永嘉禪師證道歌石刻
禪師謁六祖祖歎曰善哉少留一宿宗門謂一宿
覺

五羊觀

五羊觀在城中西南坡山上有穗石洞五仙祠吳
立夫南海古蹟記云楚高固時有五仙人持穀
穗一莖六出乘羊衣羊具五方色遺穗州人今祠

中五石云是羊化殊不類祠後有崇臺可以眺遠
其東為三元殿殿前有池片石陂陀一泓出其中
旁有石刻曰仙人足跡傳會可笑湛文簡公少讀
書於此有詩刻石同遊者庭表謾園翁山元孝超
然燕思光孝寺僧月濤南柄

海幢寺

海幢寺在羊城南下瀕江水同庭表翁山元孝蒲
衣淫遊冒雨菽舟二里抵寺門木棉方花望如赤
城之霞寺有鷹爪蘭一林藤本大兩圍榦枝相糾
花五出初作綠色久之漸黃香與魚子蘭酷似寺
故郭氏園蘭園中故物也有藏經閣極偉麗北望
白雲粵秀西望石門靈峰西樵諸山東眺雷峰即
往波羅道也南為花田南漢弊宮人處素馨花產
此寺為僧今無所建龍象莊嚴甲諸刹然無他奇
稍宜登眺耳食罷登舟往海珠寺

海珠寺

海珠石在江中上有慈度寺宋李侍郎昂英讀書
處寺有李公祠面丹霞臺下瞰江水北帶羊城佔
舶漁艇淫來如圖畫為粵人競渡之所明盛時豪
家競以翠毛鶴毳孔雀尾飾船篷用相誇尚其侈

靡如此用兵後築城置戍其上荒落不復振矣有
吳道子石刻觀音像尚存舟由濠水入魚藻門劉
鋹時有稻田自海上浮來布衣林楚材見而歎曰
水魚湫湫兮南及宋師至潘美為帥人始悟為潘
字云飲濠梁別業晤梁秀才無技

越秀山

越秀山在廣州府城北城堞因山山分為二東為
歌舞岡越王臺其西為觀音閣山半為呼鸞道偽
漢劉龔故蹟也城西為朝臺山南越志云傍江構
起華館以送陸賈因名朝臺也古蹟記云山巔有

漁洋文卷十四 小志

三

達磨泉山踞粵城最高處憑高下瞰遠江如帶目
盡炎海粵人三月三日九月九日多游於此城堞
間多榕樹木棉時暮春木棉方花紅照天外亦一
奇也

蒲澗寺

三月初四日勞書升憲副約同忍菴謬園元孝游
蒲澗寺寺在白雲山麓氣象疎古寺門諸山環抱
門內二石碣刻宋蘇文忠公詩崔清獻公詞坐禪
人大韶範成妙叶堂始食蕉子羊桃菖蒲澗在寺
左太平寰宇志云菖蒲澗一名甘溪南越志云交

州刺史陸胤之所開也襄陽羅友累石澗側容百
人坐古蹟記云南漢闢甘泉苑南有陸公亭夾溪
刺桐木棉花開殷艷如畫時久旱細流涓涓出石
罅中小魚如秧針千百為羣東上尋濂泉寺半里
許得石澗潺湲有聲涉澗而東樹益蒼鬱水聲益
清激又半里復涉澗而西澗中巨石敲立騰倚類
多姿制岸皆笏竹竹盡得寺寺數弓而朴雅絕塵
老僧興杲居之元孝言郡人陶璜苦子前身寺僧
道安也因言其從父陳公慧業記前生為廬山僧
事甚奇寺去濂泉尚里許衆疲羸不能登坐澗石
清風灑然山相傳為安期生得道處上有景泰寺
安期祠

長壽菴

長壽菴在西郭外坳於萬曆間禪人大汕重新之
汕能詩畫營造有巧思寺西偏有池通珠江水增
減應潮汐池北為半帆循廊曲折而東為繪空軒
軒前佛桑寶相諸花叢萃可愛由半帆竝池而南
緣岸皆荔支龍目池之南為懷古樓高明洞豁其

下為離六堂水木清華房廊幽窈如吳越間寺有
拈花釋迦像飾以黃金珠玉琿瑯瑪瑙瑟瑟之屬
莊嚴妙好又有銅像云是唐鑄也

南園三忠祠

大忠祠祀宋文信國陸丞相張越國三公其東祠
南園五先生五先生者孫典籍黃黃待制哲王給
事中佐趙御史介李長史德明初結詩社於南園
此其遺址崇禎戊寅巡按御史葛徵奇葺三忠祠
并錄五先生詩於版久之皆廢同年彭吏部襄為
番禺令復新之祠有池閣背枕河流亦一勝地

漁洋文卷十四

山錄

二十三

五言詩凡例

昔荀綽撰五言詩美文其書不傳而昭明之選所
錄五言詩自漢迄齊梁甚具學詩者宗焉然其
中頗雜四言又公讌應教諸篇率多蕪雜予撰
漢魏六朝五言詩視蕭選微有異同至其菁英
鮮闕略矣

樂府別是聲調體裁與古詩迥別然漢人廬江小
吏羽林郎陌上桑之類敘事措語之妙愛不能
割班姬怨歌行卓氏白頭吟被之樂府何非詩
耶至曹氏父子兄弟往往以樂府題敘漢末事

謂之古詩亦可故竝多采摭若六朝子夜讀曲等歌悉不載

齊梁以後短句已是短律唐集楊用修五言律祖既有專書茲頗取其警策絕句亦然

十九首之妙如無縫天衣後之作者願求之鍼縷襞積之間非愚則妄此後作者代興鍾記室之評躓矣愚嘗論之當塗之世思王為宗應劉以下羣附和之惟阮公別為一派司馬氏之初茂先休奕二陸三張之屬概乏風骨太沖挺拔崛超臨菑越石清剛景純豪雋不減於左三公鼎足此典午之盛也過江而後篤生淵明卓絕後先不可以時代論矣

漁洋文集十四

凡例

十四

宋代詞人康樂為冠諸謝奕奕迭相映蔚明遠篇體驚奇在延年之上謝之與鮑分路揚鑣仲偉之品於明遠多微詞愚所未解矣

齊有元暉獨步一代元長輔之自茲之外未見其人梁代右文作者尤衆繩以風雅略其名位則江淹何遜足為兩雄沈約范雲吳均柳惲差堪羽翼固知此道真賞論定不誣非可以東陽零陵身參佐命遂能劫持一代文柄也

陳朝寥寥孝穆稱首總持流品視徐未宜竝論然
華實兼美殆欲過之子堅蕪累愧其名矣

北朝魏齊之間顏介最為高唱高教曹短章不減
斛律金二君可敵南朝沈慶之曹景宗矣邢魏
之流未強人意劉昶蕭愨踰淮不化亦未易才
後周寥寥塵得子淵子山二人之才一時瑜亮
而鍾儀之悲開府為至矣

隋混一南北煬帝之才實高羣下長城白馬二篇
殊不類陳隋間人楊處道沈雄華贍風骨甚邁
已闕唐人陳杜沈宋之軌非餘子所及也

漁洋文卷十四 凡例

三五

唐五言古詩凡數變約而舉之奪魏晉之風骨變
梁陳之俳優陳伯玉之功最大曲江公繼之太
白又繼之感寓古風諸篇可追嗣宗詠懷景陽
雜詩貞元元和間韋蘇州古淡柳柳州峻潔二
公於唐音之中超然復古非可以風會論者今
輒取五家之作附於漢魏六代作者之後李詩
篇目浩繁塵取古風未遑悉錄然四唐古詩源
流可略觀焉

右略論五言升降之變如此卷之繁簡次第雖視
當時作者輩行篇什多寡然風氣轉移頗示疆

眇如阮籍別於鄴下諸子左思別於壯武諸家
叔源列於諸謝何遜江淹冠於沈范諸如此類
且存微旨覽者過於意言之外可焉

七言詩凡例

愚撰五言詩竟復鈔古逸漢魏迄唐宋金元諸家
長句為七言詩若干卷謝太傅問王子猷云何
七言詩對曰昂昂若千里之駒泛泛如水中之
鳧此命名所自也

七言始於擊壤歌雅頌之維昔之富不如時子其
懲而寤後患學有緝熙於光明至臨河歌南山

歌以下其辭匪一皆七言之權輿也鈔古歌一
卷若皇娥白帝二歌屬王嘉偽撰則附錄卷末
大風垓下肇始漢音至武帝秋風柏梁其體大具
曹子桓燕歌行陳孔璋飲馬長城窟行皆唐作
者之所本也六朝惟鮑明遠最為適宕七言法
備矣鈔漢魏六朝詩一卷梁陳隋長篇頗多而
氣不足以舉其辭浴及唐初益流繁縟愚均無
取焉

明何大復明月篇序謂初唐四子之作往往可歌
其調反在少陵之上躡矣然遂以此槩七言之

正變則非也二十年來學詩者但取王楊盧駱
數篇轉相仿倣膚辭剩語一倡百和是豈何氏
之旨哉今略取李嶠以下氣格頗高者得四篇
以見六朝入唐源流之槩云鈔初唐詩一卷

開元大曆諸作者七言始盛王右丞李東川暨高
岑四家篇什尤多李太白馳騁筆力自成一家
大抵嘉州之奇隋供奉之豪放更為剗獲今鈔
盛唐五家之作為一卷王龍標崔司勳間取一
二附之

詩至杜工部集古今之大成百代而下無異詞七

三五

漁洋文集卷十四 凡例

三七

言大篇尤為前所未有後所不逮蓋萬古元氣
之奧至杜而始發之今別於盛唐諸家鈔杜詩
一卷

杜七言千古標準自錢劉元白以來無能步趨者
貞元元和間能學杜者惟韓文公一人鈔韓詩
一卷李義山韓碑一篇追配昌黎附之卷末

宋承唐季衰陋之後至歐陽文忠公始拔流俗七
言長句高處欲追昌黎自王介甫輩皆不及也
廬山高一篇公所自負然殊非其至者鈔歐陽

詩一卷

歐陽公見蘇文忠公自謂老夫當放此人出一頭地蓋非獨古文也唯詩亦然文忠公七言長句之妙自子美退之後一人而已鈔蘇詩一卷文定視文忠邾莒矣今略十餘篇附之以備眉山一家之詩

蘇文忠公凌蹕千古獨心折山谷之詩數效其體前輩之虛懷如是後世腐儒乃謂山谷與東坡爭名何其陋邪山谷雖脫胎於杜頤其天姿之高筆力之雄自關門庭宋人作江西宗派圖極尊之以配食子美要亦非山谷意也鈔黃詩一

三五八

漁洋文集卷十四 凡例

三八

卷

元祐文章之盛推蘇門六君子黃嘗自負其詩在晁張之上碩无咎七言佳處頗得文忠之逸叔用具茨集寥寥無多一鱗片甲殆高出无咎之上議者以為惟陸務觀能髣髴之非過論也鈔二晁詩一卷

南渡氣格下東都遠甚惟陸務觀為大宗七言遜杜韓蘇黃諸大家正坐沉鬱頓挫少耳然竟非餘人所及鈔陸詩一卷

南渡以後程學盛於南蘇學盛於北金元之間元

裕之其職志也七言妙處或追東坡而軼放翁
鈔元詩一卷中州集載劉迎無黨長句數篇風
格獨高附錄

元詩稱虞楊范揭道園自負如漢庭老吏愚數觀
學古錄其詩誠非三家所及恨篇什寡耳鈔虞
詩一卷劉靜修刻畫遺山間有可采略取數篇
附之

元詩靡弱自虞伯生而外惟吳立夫長句瑰瑋有
奇氣雖疎宕或遜前人視楊廉夫之學飛卿長
吉區以別矣淵穎集宋文憲公所編今略其合

作鈔吳詩一卷

源洋文卷十四 凡例

三九

有明一代作者衆多七言長句在明初則高季迪
劉子高為最後則李賓之至何李學杜厭諸家
之坦迤獨於沉鬱頓挫處用意雖一變前人號
稱復古而同源異派實皆以杜氏為崑崙墟近
日錢受之七言學韓蘇其筆力學問足以赴之
愚於明詩別有論次此鈔不及云

愚鈔諸家七言長句大旨以杜為宗唐宋以來善
學杜者則取之非謂古今七言之變遂盡於此
觀唐人元白張王諸公悉不錄正以鈔不求備

故也舉一隅以三隅反其在後之君子

帶經堂集卷五十二

卅五

漁洋文集卷十四 凡例

三十一



故也舉一隅以三隅反其在後之君子

帶經堂集卷五十二

12024

